

Mañan lo ta prome dia di tratamiento di caso Caret



Pagina 3

- **Aruba menciona explicitamente den politica di clima Hulandes sin plan concreto**

Pagina 4

- **E problema cu zonificacion di naturalesa den ROPV**

Pagina 2

- **Ombudsman di Aruba elegi como director regional di Caribe y Latino America**

Pagina 6

Parlamento ta rechasa propuesta pa amplia derecho di voto Hulandes pa Caribe



Pagina 8

Haiti: Ta ofreciendo recompensa di \$1 miyon pa lider di gang acusa di secuestra ciudadano Mericano



Pagina 11

Gary Kasparov: Solamente un derota militar di Putin na Ucrania lo restaura speransa na Rusia y Europa



Pagina 24



\$5,000 in Total Prizes

Every Thursday & Saturday starting February 21st at 7:00 PM
Buy-in: \$50. Buy 2 Bingo Cards, get the 3rd free.

THE CASINO AT
ST REGIS
ARUBA

E problema cu zonificacion di naturalesa den ROPV


Aruba ta cas di 24.000 especie di flora y fauna, cual ta un característica cu ta haci e isla unico den Caribe, segun Natasha Silva di Aruba Conservation Foundation. A pesar di tin un naturalesa increíblemente diverso, proteccion adecua ta laga di desea. Areanan cu mester ta completamente protegi ta keda negligia den cuadra di ley, habriendo caminda pa exceso den actividad humano cu—den casonan severo—por resulta den e extincion di nos flora y fauna.

E esaki ta e problema principal di e zonificacion di naturalesa den cuadra di ROPV.

E Ruimtelijke Ontwikkelingsplan Volkshuisvesting, conoci como ROPV, ta e framework di zonificacion y desaroyo espacial na Aruba. E ta designa diferente zona riba henter e isla, for di zonanan di vivienda, zonanan di naturalesa pa hasta zonanan marino. E ROPV ta determina ki tipo di actividad y desaroya ta permiti den cada area.

Pa loko ta zonanan di naturalesa, e ROPV ta reconoce dos diferente area: area di 'natuurgebied' y area di 'natuur en landschap'. Aunke tur dos zona tin como prome funcion e proteccion y restauracion di naturalesa, e diferencia principal entre e dos zona aki tin di haber cu e nivel di proteccion y maneho.

Den areanan marca como 'natuurgebied', proteccion pa flora y fauna ta mas estricto, unda maneho y supervision ta cay bao responsabilidad di Aruba Conservation Foundation. Cualquier actividad



of intervencion humano ta depende di e autorisacion di ACF. Den areanan marca como 'natuur en landschap', proteccion ta menos estricto, unda DNM ta actua como autoridad di maneho, pero en realidad no tin control directo manera ACF tin den areanan di natuurgebied.

Den zonanan marca como 'natuur en landschap', actividad humano no ta ser monitoria estrictamente, loke ta presenta un menasa pa especienan di bestia y mata den e area. Tambe tin un falta di consistencia den kico ta marca como natuurgebied y kico ta 'natuur en landschap' den cuadra di ROPV.

Inconsistencia riba mapa
Segun e plankaart di ROPV, e area mas grandi di natuurgebied ta Parke Nacional

Arikok, cual manera a menciona ta cay bao maneho directo di ACF. Banda di esaki, otro natuurgebied riba e isla ta plama na diferente parti, ta hopi mas chikito y algun ta hasta situa dentro di areanan designa como 'natuur en landschap'.

Segun ACF ta splica, e falta di distincion cla aki ta resulta den actividad humano (excesivo) den areanan di naturalesa protegi.

Por ehempel, Tera Cora na Westpunt ta cay ambos den zonanan designa como natuurgebied y 'natuur en landschap'. Tera Cora ta un area cu ta rico den flora y fauna, y ta funciona como un area importante pa entre otro turtuga, sternchi y coral. Sinembargo, pasobra e ta legal-

mente cay den zona di 'natuur en landschap' tambe, por mira actividad humano den e area, incluyendo uso di UTV y ATV.

Mescos ta conta pa e otro banda di nos isla, esta na Serro Colorado.

Riba e mapa di ROPV por mira cu dentro di un area grandi designa como 'natuur en landschap', tin un strepi cu ta designa como natuurgebied. Por observa den e mapa un pida chikito di 'natuur en landschap' cu ta separa e natuurgebied cu lama.

E zonificacion di areanan den cuadra di ROPV ta algo cu ta ser determina pa gobierno, a base di investigacion conduci pa Directie Milieu en Natuur (DNM). DNM tin un equipo cu ta haci inventario, cual a studia e diferente areanan riba nos isla pa evalua ki balor nan tin y asina haci nan recomendacion di con pa designa nan.

Pa areanan di naturalesa, ta evalua entre otro ki sorto di especie ta biba eyan y si nan ta endemico of protegi pa ley caba.

Segun ACF ta splica, DNM den pasado a presenta un lista largo di especienan pa ta considera como protegi. Sinembargo, gobierno e tempo ey a dicide cu e lista tabata demasiado largo, y a pidi pa corta e lista pa inclui apenas par especie. Y esaki tambe ta trece problema den relacion cu zonanan natural.

Silva ta splica cu e recorte den e lista di especienan presenta pa DNM ta resulta den falta di proteccion adecua pa esnan cu a keda afo. Por ehempel, aunke tin dies especie di sternchi cu ta migra tur aña pa Aruba, Silva ta splica cu apenas dos so ta considera especie protegi bao ley.

Na mesun momento, e diferencia entre zonanan designa como 'natuur en landschap' y natuurgebied ta haci cu a pesar di ta considera protegi bao ley, e especienan aki ta keda vulnerable pa actividad humano pasobra no tin zonificacion adecua.

Un ehempel ta e sternchi, cu ta traha su neishi riba e costa panort di nos isla, cual ta designa mayormente como zona di 'natuur en landschap', manera por mira riba mapa di ROPV.

Recien Bon Dia Aruba a publica un articulo tocante e temporada di sternchi, unda ACF a splica cu esakinan ta parhanan extremadamente sensitivo. Nan sa pone nan webo entre barancanan riba e costa panort di e isla, unda esakinan ta cay victima di wordo trapa pa hende of vehiculo.

Turismo ta pidi pa mas sostenibilidad


Un di e problemanan cu ACF y otro organisacionnan ambiental na Aruba ta enfrente ta specialmente e uso di ATV y UTV den areanan di naturalesa.

Silva ta splica cu e ta comprende cu ta dificil pa companianan di tour implementa cambionan radical den un modelo di negoshi cu ta genera entrada. Na mesun momento, a enfatisa cu ta mirando un cambio den percepcion di turistanan cu ta bishita Aruba. Turistanan ta birando mas y birando interesa den nos cultura y naturalesa, en bes di e "adventure tourism" cu sa ser promovi pa companianan di tour.

Esaki ta señala un oportunidad grandi pa Aruba; desvia di sobredesaroyo y actividad excesivo den zonanan natural, y pone mas atencion riba kico ta haci Aruba unico—nos naturalesa y cultura. Manera Silva ta subraya: "Mas respetuoso bo ta (cu nos fauna y flora), mas frecuente bo por mira nan y disfruta di nan."



Mañan ta prome dia di tratamento di caso Caret



E proceso penal relaciona cu e tiramento fatal di polis riba Ayden C'Jay Lanoy di 19 aña, ta bay drenta un etapa decisivo. Mañan ta bay tuma luga e prome dia di tratamento di e caso cu lo marca e inicio di e proceso final pa trece claridad pa tanto famia di e victima como comunidad.

E caso conoci como "Caso Caret," ta sigui mantene gran interes y atencion den comunidad un aña despues di e evento tragico cu a conmociona Aruba.

Lanoy a perde su bida den oranan di marduga di 9 di februari 2025, despues di a ser tira pa polis durante un intento di detencion den area di Madiki. Segun informenan anterior, oficialnan policial a purba para e vehiculo cu e hoben tabata core, supuestamente pa motibo di un violacion di trafico. Ora cu e no a cumpli mesora, un persecucion a sigui. E situacion a escala despues cu e vehiculo a para den un bario residencial, caminda dos agente policial a los tira riba e auto di Lanoy cu consecuencia cu un bala a alcanc'e.

Despues di e incidente aki Ministerio Publico a lansa un investigacion penal. E investigacion ey a conclui cu e agentenan policial a los 20 tiro durante e confrontacion. E dos agente policial a ser acusa desde e tempo ey di complicidad den homicidio imboluntario en conexcion cu e tiramento fatal aki. E decision pa persigui e polisnan a marca un desaroyo significativo den e caso y a enfatisa e seriedad cu cual autoridadnan ta tratando e asunto.

E morto di e hoben Arubiano a lanta un debate amplio riba henter e isla. Den e dianan despues di e tiroteo, ciudadanonan a reuni den manifestacionnan pidiendo pa transparencia, responsabilidad y husticia.

Durante e audiencia preliminar (e asina yama "reggiezitting") cu a tuma luga dia 7 di november 2025, corte a atende varios peticion investigativo di tanto fiscal como defensa. Un parti significativo di e discusion tabata enfoca riba imagennan di video y otro evidencia tecnico cu a ser colecta durante e investigacion.

E abogadonan di defensa, entre nan abogado Vito Carlo, a insisti riba importancia di trata e grabacionnan cu precision. El a indica cu den un di e camaranan, e audio y e imagen ta core sincronisa, pero den e otro, e audio ta atrasa, loke por crea confusion riba e momento exacto cu a los e prome tiro, un punto cardinal pa defensa y crucial pa determina si tabatin un tiro di advertencia y den ki momento e tironan a tuma luga.

E peticion di defensa tabata pa haya un informe adicional (proces-verbaal) cu un resumen detaya di loke tanto ta wak como loke ta ser scucha den tur dos camara. Abogadonan di defensa a pidi tambe pa haci un investigacion pa medio di un tercer partido independiente, cu e condicion cu e ta un instancia reconoci y confiabel den e area forensico audiovisual.

Hues a splica cu den e dossier ya tin paginan cu ta detaya e secuencia di e tironan y e diferencianan den grabacion. Segun corte, esey ta suficiente pa un evaluacion inicial di e evidencia visual. A nota cu segun e standard di investigacion, un discrepancia leve den audio no ta automaticamente altera e conclusionnan, basta cu e fuente principal ta correctamente sincronisa.

Pa e motibo ey, hues a rechasa e peticion pa un proces-verbaal di audio separa. Corte a considera cu e investigacion forensico ta completo pa e etapa aki.

Pa loke ta e peticion pa ekipo di defensa realiza un analisis extenso pa medio di un tercer partido, tanto hues y OM a indica cu ta nan derecho pa hacie, y a indica cu esaki mester ta cla prome cu fecha di tratamento di e caso.



Durante e audiencia preliminar aki tambe a discuti si e materia audiovisual di e suceso lo ser mustra den corte durante e tratamento. Aunke e representante di e famia a expresa preocupacion cu esey por ta traumatico pa e famia, tanto Ministerio Publico como e ekipo di defensa di e acusadonan a insisti cu esey ta un parti esencial pa un tratamiento husto y completo. Na final hues a confirma cu e imagen lo ser presenta durante e tratamento di e caso.

Hues a determina cu e tratamiento substancial di e caso lo tuma luga durante dos sesion principal. E prome dia di audiencia ta programa pa mañan diabierna 20 di februari. Durante e sesion aki, ta spera cu corte lo analisa e hechonan di e caso profundamente, incluyendo declaracion di testigonan, resultadonan forensico y material audiovisual. Hues lo scucha splicacionnan detaya di fiscal y repasa e pruebanan cu ta forma e fundeshi di e acusacionnan.

E di dos dia di e audiencia lo tuma luga dialuna 23 di februari durante cual fiscal di Ministerio Publico lo presenta su rekisitorio, delineando e conclusionnan di e investigacion y lo presenta su peticion pa sentencia pa e acusadonan. Defensa tambe lo tin e oportunidad pa responde extensivamente, presentando su argumentonan y contesta e interpretacion di e evidencia di e fiscal. Tambe e famia di e victima por eherce su derecho legal pa dirigi su mes na corte, dunando nan un oportunidad pa papia tocante e impacto di e perdida

y nan perspectiva riba e caso. Si ta necesario, corte lo programa un sesion adicional dia 26 di februari pa garantisar cu tur partido ta ser scucha completamente y cu e procedimiento ta ser conduci cu e detaye necesario den un caso di e magnitud aki.

Pa famia di Lanoy, e tratamiento substancial di e caso ta representa otro capitulo dificil den un proceso cu ya tabata emocionalmente pisa. Durante di e fasenan di investigacion y sesion preliminar den corte, nan a expresa consistentemente nan deseo pa claridad y responsabilidad.

Pa e oficialnan involvi, e huicio ta un oportunidad pa presenta nan relato di loke a sucede e anochi ey. Nan representantenan legal a argumenta cu e circunstancianan tabata compleho y a evolucionar rapidamente, enfatisando e necesidad pa considera e contexto mas amplio den cual e oficialnan a tuma nan decisionnan.

Na final e corte lo tin e tarea di determina si e uso di forza tabata legalmente hustifica of si el a crusa e drempele pa conducta criminal.

Caso Caret ta un caso di gran importancia pa sistema hudicial di Aruba. E manera con corte maneha e proceso, evalua e prueba y yega na un decision lo tin impacto riba confianza publico den estado di derecho. Hopi ciudadano ta sigui e desaroyo di e caso cu gran interes, consciente cu resultado lo tin implicacion pa futuro relacion entre polis y comunidad.



Aruba menciona explicitamente den politica di clima Hulandes, pero falta plan concreto ainda

Aruba ta muestra cla pa haya un rol mas defini dentro di e politica di clima mas amplio di Reino durante e proximo periodo di gobernacion Hulandes. Sinembargo, no ta cla con e envolvimento aki lo ser concretisa y ki recursonan lo ta disponibles. Esaki ta bisto for di un lista oficial di preguntanan di e Comision Fiho di Finanzas di Tweede Kamer tocante e acuerdo di coalicion 2026-2030 "Getting to work. Building a better Netherlands," cu ta puntra explicitamente con Aruba, Corsou, Sint Maarten, y Caribe Hulandes lo ser inclui den e strategia di clima Hulandes.

E preguntanan ta forma parti di un documento integral den cual e Comision Fiho di Finanzas di Tweede Kamer cu ta haci centenares di pregunta tecnico y politico tocante e acuerdo di coalicion y e tabel di presupuesto acompañante. Nan ta cubri un rango amplio di topico, cu ta varia di cuido di salud y seguridad social te na defensa, digitalisacion y energia. Entre e temanan aki sinembargo tin tambe un referencia directo na e parti Caribeense di Reino.

Tweede Kamer kier sa "con Aruba, Corsou, Sint Maarten, y Caribe Hulandes lo ta involvi den formacion di politica di clima, mirando nan vulnerabilidad halto pa cambio di clima."

E formulacion ey ta bisa hopi. No solamente ta menciona Aruba explicitamente, pero ta reconoce tambe cu e islanan ta particularmente vulnerabel pa e efectonan di cambio di clima. Esaki ta un señal politico importante, specialmente den un documento cu primordialmente ta enfoca riba hustificacion financiero y decisionnan presupuestario.

Cambio di clima ta un tema concreto pa Aruba pa años caba. Temperaturan mas halto, periodonan mas largo di segura, y presion riba reservanan di awa ta un realidad. Subida di nivel di lama tambe ta forma un riesgo pa areanan di costa, mientras cu turismo – e motor economico di e isla – ta hopi dependiente di condicionnan natural y climatico stabiel.



Suministro di energia tambe ta hunga un rol. Aruba ta depende pa gran parti di combustibelnan importa, haciendo e isla vulnerabel pa aumento di prijs y fluctuacionnan di mercado internacional. Na mesun momento, Aruba tin ambicionnan riba tereno di energia sostenibel, incluyendo pa medio di energia solar y otro fuentenan renobabel.

Den e luz aki, ta relevante cu Parlamento Hulandes ta puntra explicitamente con e islanan lo ta involucra den politica di clima. E pregunta aki ta implica cu politica di clima dentro di Reino no por ser diseña unicamente na un manera Europeo-Hulandes, pero mester tene cuenta cu e circunstancianan specifico di Caribe.

E lista di pregunta ta muestra cu clima y energia ta ocupa un lugar prominente den e acuerdo nobo di coalicion. Miembronan di Parlamento a haci pregunta tocante metanan di reduccion di CO2 pa 2030, 2040 y 2050, y tocante inversionnan den biento riba lama, hidrogeno berde, economia circular y infraestructura di energia. Nan a puntra tambe tocante e alcance financiero di varios medida di clima y con nan ta ser incorpora den e presupuesto.

Mientras cu hopi di e medidanan aki primordialmente ta pertenece na Hulanda mes, nan lo por impacta Aruba tambe indirectamente. Al fin y al cabo, Reino ta opera como un solo estado bou di acuerdonan internacional di clima. Es mas, Hulanda por influencia proyectonan sostenibel den e parti Caribeense di Reino pa medio di fondo, subsidio, of cooperacion tecnico.

Sinembargo e documento ta laga poco cla si lo reserva presupuesto of programanan specifico pa Aruba. E pregunta di Parlamento ta demostra un necesidad di claridad, pero e documento mes no ta contene ningun contesta concreto ainda.

Ta sorprendente cu e pregunta tocante Aruba ta ser haci den cuadro di vulnerabilidad pa cambio di clima. Esaki ta nifica cu miembronan di Parlamento ta reconoce cu e islanan ta den un posicion diferente cu Hulanda Europeo. Tormentanan tropical, calor extremo y erosion di costa por lo general ta afecta Caribe mas severamente y rapido.

E reconocimiento aki por forma e base pa solucionnan personalisa dentro di Reino. Adaptacion climatico riba un isla manera Aruba ta rekeri diferente solucion cu den un pais densamente pobla, manera Hulanda. Pensa riba inversionnan den proteccion di costa, produccion di awa sostenibel, infraestructura resistente na calor, y generacion di energia na escala chikito y descentralisa.

Sinembargo, reconocimiento no ta nifica automaticamente cu lo haci recursonan adicional disponibles. E preguntanan parlamentario ta destina pa pone e gabinete duna mas aplicacion. Contesta di gobierno lo mester determina si e envolvimento di Aruba lo keda limita na consulta y coordinacion di maneho, of si realmente lo brinda sosten financiero y tecnico.

E preguntanan haci den e documento ta pone enfasis riba e importancia di e envolvimento aki: mester inclui Aruba y e otro islanan den e desaroyo di politica di clima,

netamente pa motibo di nan posicion vulnerabel.

E mencion explicito di Aruba por indica un conscientisacion creciente na Den Haag cu politica di clima dentro di Reino no por ser mira separa for di e region di Caribe. E islanan ta parti di e mesun entidad nacional y finalmente ta comparti obligacionnan internacional.

Caribe Hulandes – Boneiro, Sint Eustatius, y Saba – ta menciona den e mesun pregunta cu Aruba, Corsou, y Sint Maarten. Esaki ta sugeri cu por ta considerando un strategia Caribeense mas coherente dentro di Reino. Pa Aruba, esaki por presenta tanto oportunidad como reto.

Di un banda, colaboracion cu Hulanda por conduci na acceso di experticio, rednan di conocimiento, y instrumentonan financiero cu di otro manera lo ta dificil pa yega na dje. Di otro banda, ta importante pa Aruba mantene suficiente latitud di politica pa pone su propio prioridadnan y tene cuenta cu e contexto economico y social local.

Un aspecto clave di e documento ta e enfasis riba hustificacion presupuestario. E Comision di Finanzas no solamente ta haci preguntanan di politica pero tambe kier sa con e medidanan ta ser calcula financieramente. Esaki ta conta tambe pa medidanan di clima.

Pa Aruba e dimension financiero ta esencial. Adaptacion na clima y transicion di energia ta rekeri inversionnan cu por ta un peso relativamente pisa riba e presupuesto pa un isla chikito. Si Reino ta serio tocante un acercamento di clima conhunto, e pregunta

di financiamento tambe lo mester ser contesta.

Sinembargo e lista di pregunta actualmente no ta contene sumanan specifico pa Aruba. Mientras cu ta dunando atencion, e recursonan no ta defini bon cla ainda den e documento.

E inclusion di Aruba den e preguntanan parlamentario por ser mira manera un impulso politico. E topico ta riba mesa na Den Haag, cu ta ofrece oportunidad pa mas dialogo dentro di Reino. Esaki lo por ta un oportunidad pa Aruba forma claramente su propio prioridadnan y aporta esakinan activamente den consultanan cu Hulanda.

Esaki por encera proyectonan specifico, manera expansion di energia solar, mehora almacenamiento di energia, proteha areanan di costa vulnerabel, of modernisa maneho di awa y desperdicio. Tambe Aruba por a enfoca riba intercambio di conocimiento y sosten tecnico, por ehempel, den e areanan di adaptacion na clima y infraestructura sostenibel.

Sinembargo, ta cla cu e rumbo di accion final lo depende di e contesta riba e preguntanan parlamentario y e desaroyo mas aleu di e acuerdo di coalicion.

Loke e documento aki primordialmente ta demostra ta cu Aruba no ta ser lubida den e discusion Hulandes riba politica di clima. Tweede Kamer ta puntra explicitamente con e islanan lo ta involucra den forma e politica ey, must-rando riba nan vulnerabilidad halto pa cambio di clima.

Esaki ta un señal importante di reconocimiento. Na mesun momento, e ta keda un pregunta pa awor. Si e atencion aki lo traduci den medidanan concreto, financiamento y cooperacion estructural ta keda pa mira.

Pa Aruba, esaki ta nifica cu e proximo lunanan lo por ta crucial. Reconocemento politico t'ey, pero ainda falta e implementacion real di un acercamento di clima pa henter Reino. E discusion na Den Haag a cuminsa – awor ta keda pa mira si esaki lo conduci na pasonan tangibel pa e parti Caribeense di Reino.

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart-Boekhoudt

Redaccion

noticia@bondia.com

Pilar Flores (hefe di redaccion)
Angenette Figueero (closer editor)

Leo Maduro
Dilma Arends
Raisa Montilla
Oriana Geerman

Ehecutivo di Benta

Sulaika Croes
sulaika.croes@cspnv.com
Mark Gomes
mark.gomes@cspnv.com

Aviso y Arte

Sandra Loefstop

Lisa Tromp

Departamento Digital

Juan Luis Pinto

Administracion accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Martin Boekhoudt
Francis Dirks

Colaboracion

Associated Press
Ret Karibense
Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22
Tel: 582-7800

Email: noticia@bondia.com
aviso@bondia.com
info@bondia.com

Website: www.bondia.com
Facebook: @bondianoticia
Instagram: bondiaaruba

BON DIA ARUBA ta un corant
redacta y imprimi na Aruba y ta
obenibel di dialuna te cu diasabra.
Ningun contenido por wordo reproduci
sin permiso di editor.



Editorial

Cultura, ta asina hopi... Mas, cu fiesta y cuminda...

Den e dianan aki nos ta topa cu dos elemento importante di loke ta considera 'nos cultura': carnaval y nos Papiamentu. Un a termina e siman aki y e otro ta haya atencion special pasobra 21 di februari ta Dia Internacional di Lengua Materno. Carnaval ta e prueba palpable cu influencia cultural di exterior por bira algo 'di nos' den poco tempo. Esey ta positivo, momento festivo ta importante pa cualkier pueblo, basta ta pueblo mes ta scoge y no cu comercio internacional ta stipula kico ta bay celebra, djis pasobra ta nan ta bende material pa haci fiesta. Celebracion di e dia internacional menciona pa nos tin un toque special. No solamente nos idioma ta un motibo di orguyo, pa cual no mester duna splicacion, pero tambe pasobra por considera Papiamentu, den ambos variante ortografico, e lenga crioyo di nos continente di mayor exito. Na otro paisnan tin intento pa duna e idioma cu a surgi den ultimo siglonan den e encuentro di varios cultura, nan lugar mereci, pero no tin un situacion unda e idioma a conquista un lugar asina central, entre otro reconoci como idioma oficial, usa den parlamento y presente den enseñanza di e islanan concerni. Motibo pa festeha? Si, basta nos corda cu esey no ta bisa tur cos, y cu trabao no a caba ey. E decision di lucha pa formaliza nos idioma ta trece cierto responsabilidad cune, cu te awe a keda un pregunta sin contesta. Un di e deseonan cu nos a trece dilanti na varios ocasion ta e necesidad di por dispone di un diccionario 'splicativo', den cual no solamente ta registra palabra den secuencia alfabetico, sino cu cada un ta haya su debido splicacion conciso. E diccionario ey, cu su traducccion den e otro idioma importante pa nos, lo ta e comunicacion cu nos mester pa sigui progresa. Esaki tin un motibo particular tambe. Papiamentu a bira loke e ta, un tipo di 'Esperanto' no-artificial, hustamente pa via di e interaccion cu e otro idioma aki y esey pa futuro no lo cambia. Nos sobrevivencia economico ta depende di e comunicacion fluido den e cuatro idioma aki. Nos sa cu esaki ta un trabao inmenso, pero como medio di comunicacion, cu ta parti tur dia di e desaroyo di nos idioma, nos ta convenci cu e capacidad pa haci e trabao aki ta presente. Y, sin deseo di ofende ningun hende, nos no ta kere cu mester sinta warda pa gobierno inicia e proceso aki; e iniciativa por bin di otro banda.

Pero nos pensamiento no por ta limita na aspecto di cultura, manera idioma, tradicion, musica, poesia y cuminda tradicional. Cultura ta encera hopi mas cu esey. Den sentido sociologico, por bisa cu 'cultura' ta e otro

cara di 'estructura'. Estructura ta con sociedad ta organiza; cultura ta e forma particular cu ta haci esaki den un sociedad determina. Esey ta hiba nos na otro aspecto di nos manera di biba, cu ta importante pa sobrevivencia, den bida diario y tambe den condicion extremo. Cultura ta encera anto tambe, por ehemplo: Con nos ta biba, con nos ta duna forma na nos alrededor fisico? Un parti di esey ta con nos ta biba, con nos ta traha cas? Nos sistema di construcccion ta responde na... kico? Peligro di temblor? Si, pero kico si nos haya un horcan? Nos tin casi un siglo ta traha cas cu un dak cu no por resisti un horcan di categoria mayor. Esey semper tabata asina? No, nos antepasadonan tabata traha vivienda bon pensa, probechando biento envez di hacie un problema pa ventilacion. Nan tabata traha dak cu ta cay paden di e murayanan, pa evita cu biento fuerte por ranca nan. Nos ta haya nos awendia den e tristo situacion, unda - cu razon - ta lamenta cada cas antiguo cu ta bay perdi, mientras e perdida no ta solamente pasobra nan mester ta un monumento, sino ademas un monumento cu por siña nos algo di valor pa futuro. Inverti den monumento no ta solamente un cuestion di conserva edificio pasobra nan ta atractivo y un bunita recuerdo di nos pasado; nan ta tambe sumamente importante den sentido educativo.

Y den e epoca moderno aki a bin un aspecto importante acerca. Mundo henter ta preocupa pa e manera con ser humano ta usa, transforma y hasta abusa di nos ambiente fisico. Nos ta consciente di e hecho cu avisa hende awe, cu aki 50 aña nivel di lama por ta un metro mas halto, o cu temperatura promedio lo a subi dos grado Celsius mas, no lo ta algo cu ta causa preocupacion, mas bien tin di nos cu lo pensa: "Nos ta cruza e brug ey dia nos yega ey." Claro cu hopi di nos lo no t'ey mas aki 50 aña, pero esey ta libera nos di e responsabilidad pa pensa awe caba kico lo ta corecto den nos forma di biba? Si nos pensa cu no worry awe pa loke nos no haci bon ta e strategia, esey ta e 'cultura', e manera di pensa cu nos kier transmiti na e siguiente generacionnan? No, pero pakico nos no ta atende anto e problemanan di awe? Por ehemplo, cu si nos no ta busca y haya solucion, nos ta hoga den suciedad, pasobra nos ta incapaz pa bin cu solucion pa e enorme monton di desperdicio cu 120.000 ciudadano plus mas di 25.000 turista diariamente presente, ta produci. Continuamente no atende cierto problema y pospone nan pa 'mañan' cu nunca ta yega, tambe mester ta parti di nos 'cultura'?

Aruba a conoce e prome miyonario pa 2026 cu Lotto!

Diamars anochi 17 di februario tabatin e sorteo miyonario di Mini Mega y Mega Plus. E numbernan ganado di Mini Mega pa diamars anochi tabata: 10-11-17-29 y e Mega Ball: 01 y manera e resultado a wordo procesa a bin haya sa cu tin 1 solo ticket ganado.

E feliz ganado a gana e jackpot total di Mini Mega y Mega Plus di 1 miyon 750 mil florin cu a wordo bendi na rebendado Lucky Cher-Ann 2.

Diaranson, Aruba ta cera conoci cu e prome feliz miyonario cu Lotto, e loteria di Aruba pa aña 2026. Miloushka ta conta cu el a cumpra numbernan loco na Lucky Cher-Ann 2 y ora cu el a haya sa cu tabatin 1 solo ganado pa e sorteo miyonario di diamars anochi, el a bay check su ticket y pa su gran sorpresa e tabatin e ticket miyonario di Afl. 1.750.000,-!

Den e mesun temporada aña pasa Aruba a conoce e miyonario cu a gana e jackpot record di Afl. 4.350.000,- cu Aruba a conoce cu e wega di

Mini Mega y Mega Plus! Lotto, E Loteria di Aruba tin diferente wega, Catochi, Big 4, 1-OFF, Zodiac, Wega di Number di Korsou di Lotto, Lucky 3, Multi-X, Lotto di Dia, Lotto 5, Mini Mega y cu su Mega Plus y e diferente weganen di Raspa y Gana y Instacash.

Cumprando Lotto bo ta contribui na deporte riba nos isla. E meta ta pa organisa loteria, cambia bida di su hungadonan y na mes momento inverti den deporte local pa medio di donacionnan na e comision di subsidio.



Minister Arthur Dowers a haci un bishita di trabao na DIMAS y reafirma compromiso pa mehoracion structural

Diamars mainta, Minister di Husticia, Integracion, Transporte Publico y Energia, mr. drs. Arthur Dowers, a haci un bishita di trabao na Departamento di Integracion, Maneho y Admision di Stranhero (DIMAS). Durante e bishita aki, Minister Dowers a tene un reunion constructivo cu Directora di DIMAS Kathy Ruiz-Paskel.

E bishita tabata enfoca riba evaluacion di proceso actual y identificacion di oportunidadnan pa fortalece y modernisa e sistema, cu e meta di mehora eficiencia y servicio na publico. Minister Dowers a reconoce e esfuerso cu empleadonan di DIMAS ta



haci diariamente pa atende un volumen considerable di peticion y demanda creciente. DIMAS tin un rol crucial den nos pais y ta rekeri inversionnan continuo den innovacion, tecnologia y capacidad humano pa asina por sigui

garantisa un servicio transparente, eficiente y confiabel pa tur cliente.

Minister Dowers a reafirma cu Gobierno ta comprometi cu un sistema di admision y integracion cu ta evoluciona



conforme necesidadnan di nos pais. E meta ta pa sigui reduci e tempo largo di espera, aumenta claridad den proceso y fortifica comunicacion cu cliente.

Ta trahando riba un sistema

solido, moderno y humano den cual integridad, respet y responsabilidad ta keda e base di e maneho. Hunto cu DIMAS, nos ta sigui construi un sistema cu ta sostene desarrollo y estabilidad laboral na Aruba.

Ombudsman di Aruba elegi como director regional di IOI pa Caribe y Latino America

Ombudsman di Aruba, mr. Sra. Jurima Bryson a wordo eligi como Regional Director for the Caribbean & Latin American Region di e Institucion Internacional di Ombudsman (IOI, the International Ombudsman Institute).

Tabata na juni 2025 cu Bureau Ombudsman a anuncia cu Ombudsman di Aruba a bira miembro di IOI despues di un screenmento extenso door di IOI. IOI ta un organizacion internacional cu ta reuni mas di 200 institucion di Ombudsman den mas di 100 pais. Su meta ta pa fortalece cooperacion, bon goberna-

cion, transparencia y proteccion di derechonan humano.

Como Regional Director pa Caribe y Latino America, Sra. Bryson lo representa e region aki den IOI. E lo yuda tambe pa promove cooperacion y pa comparti conocimiento entre paisnan.

E nombramento aki ta muestra cu e trabou di e Ombudsman di Aruba ta wordo reconoci na nivel internacional. Tambe e ta fortalece e posicion di Aruba den e network mundial di Institucionnan di Ombudsman.

Sra. Bryson ta masha agradecido cu e oportunidad

unico aki: "Cu honor mi ta ricibi e bon noticia aki pa mi persona y pa Aruba completo. Hunto cu apoyo di mi team nos a establece un instituto imparcial, independiente y profesional riba nos isla chikito. Ta bunita pa wak cu den e fase inicial ya caba ta haya atencion internacional. E outcome ta cu awor Aruba tin acceso na un network mas amplio y cu nos Institucion di Ombudsman ta wordo reconoci riba nivel internacional. Manera mi ta bin ta haci como Defensor di Pueblo di Aruba, mi lo eherce mi rol como Regional Director pa e region di Caribe y Latino America cu dedicacion."



Casi seis di cada dies trahador di cuido na Hulanda ta enfrenta agresion di pashent y famia

(NLTimes)—Agresion contra trahadornan di sector di cuido y bienestar na Hulanda ta keda amplio, a pesar di campaña di gobierno y medidanan institucional, segun CBS. Na 2024, 57 por ciento di empleadonan den sector di cuido a bisa cu nan a enfrenta agresion di pashent of nan famia y amigo, casi igual cu 2020. Na 2019, prome cu e pandemia di COVID-19, mas o menos 60 por ciento a reporta experiencia similar.


Agresion verbal tabata e forma mas comun, afectando 48 por ciento di trahadornan. Intimidacion y burla a ser reporta pa 25 por ciento, agresion fisico pa 21 por ciento, discriminacion pa 16 por ciento, intimidacion sexual pa 14 por ciento y menasa of intimidacion pa 10 por ciento.

Trahadornan social y conseheronan di grupo of residencial tabata mas afecta, cu 79 por ciento reportando agresion den casi tur forma. Ciudadornan a enfrenta mas

frecuentemente acoso sexual y agresion fisico, mientras specialistanan manera psicologo y trahadornan social a reporta principalmente menasa y discriminacion.

Limpiadornan y personal di cushina a experiencia e menos agresion, cu 30 por ciento, mientras personal pedagogico, hopi biaha den cuidu di mucha, a reporta 36 por ciento, principalmente abuso verbal y burla.

Carga di trabao tambe a influencia exposicion. Empleadonan cu a reporta carga pisa di trabao a enfrenta agresion na un tasa di 68 por ciento, compara cu 54 por ciento di esnan cu carga manehable. Esnan cu a bisa cu nan no tin suficiente tempo pa pashent a enfrenta agresion na 75 por ciento, contra 57 por ciento di



coleganan cu si tabatin suficiente tempo.

Hombenan y muhernan a experiencia agresion na un tasa generalmente similar, pero hombernan a ser mas frecuentemente menasa of acosa, mientras muhernan tabatin mas chance di enfrenta intimidacion sexual, incluy-

endo fluitmento, comentario sexual, mishimento no desea of agresion.

Empleadonan mas hoben a reporta agresion mas frecuentemente cu coleganan mas bieu. Mas o menos un tercera parti di trahadornan di cuidu tambe a reporta intimidacion of acoso di coleganan of supervisor.

A pesar di e desafionan aki, trahadornan di cuidu cu a experiencia agresion ta keda casi mesun comprometi cu nan trabao compara cu coleganan cu no a experiencia esey.

Sinembargo, 19 por ciento ta reporta cu nan ta sinti burn-out, compara cu 12 por ciento di esnan no afecta, y 16 por ciento ta bisa cu nan ta frustra, compara cu 9 por ciento.

Kenia lo introduci inyeccionnan pa prevencion di HIV na maart

(AFP)—Kenia lo lansa un medicamento innovador nobo pa prevencion di HIV na luna di maart den 15 region prioritario, e ministerio di Salud a bisa diaranson.

Lenacapavir, cu ta ser tuma dos biaha pa aña, a muestra cu e ta reduci riesgo di transmision di HIV cu mas di 99.9 por ciento, aunke tecnicamente e ta un medicamento quimico y no un vacuna, pasobra e no ta entrena e sistema inmunologico.

Kenia tabata entre nueve pais Africano selecta aña pasa pa introduci lenacapavir, unda implementacion ya a cuminsa na Sur Africa, Eswatini y Zambia desde december.

E region ur y oriente di Africa ta representa mas o menos 52 por ciento di e 40,8 milyon persona cu ta biba cu HIV na mundo, segun dato di UNAIDS di 2024.

Kenia a ricibi su prome lote di 21.000 dosis diamars via un acuerdo cu fabricante di lenacapavir, Gilead Sciences, y Global Fund to Fight AIDS.

“E prome fase di implementacion lo cuminsa na comienso di maart, cubriendo 15 condado,” minister di Salud Aden Duale a bisa den un declaracion.

“Nos ta spera 12.000 dosis di continuacion adicional pa april,” el a agrega.

E minister a bisa cu gobierno di Merca a compromete pa suministra Kenia, cual tin un prevalencia di HIV di 3,7

por ciento, cu 25.000 dosis adicional di e medicamento.

Introduccion di lenacapavir ta bin mientras paisnan Africano ta lucha cu recorten di ayudo di parti e administracion di presidente Donald Trump cu a afecta programanan di HIV/AIDS den e continente.

Kenia tin relacion cerca cu Merca y na december a firma un acuerdo di ayudo di salud di \$2,5 bilyon—e prome acuerdo bilateral di e tipo ey despues cu Trump a elimina agencia USAID y a pone ONGonan na un banda.

Bao di e acuerdo, Merca lo provee \$1,6 bilyon durante cinco aña pa Kenia pa trahar riba asuntonan di salud incluyendo combate contra HIV/AIDS y malaria y prevencion di polio.

Kenia mester contribui \$850 milyon adicional y gradualmente asumi mas responsabilidad.



Jolley Holding Aruba
V.B.A.

JOB OPPORTUNITY

Assistant Financial Controller

Jolley Holding consists of 25 operating companies with diverse activities such as car dealers, car rental and leasing, retailing of souvenirs, gifts, books, leisure clothing etc, wholesale of consumer goods and pharmaceuticals, industrial laundry, real estate. The Group is active in Aruba, Bonaire, Curaçao and Antigua.

We are looking for a driven and detail-oriented Assistant Financial Controller to support the Financial Controller in managing day-to-day finance operations, financial reporting, and internal controls. This role is ideal for an ambitious finance professional who wants to grow into a senior controlling or managerial finance position.

Key Responsibilities:

- Support monthly, quarterly, and annual financial reporting cycles.
- Assist in preparing budgets, forecasts, and variance analyses.
- Perform GL reconciliations and help maintain accurate accounting records.
- Support AP/AR processes, fixed assets administration, and payroll controls.
- Monitor internal controls and contribute to process improvements.
- Prepare management dashboards and financial analysis reports.
- Provide support during internal and external audits.

Profile & Qualifications:

- SPD or MBO in Accounting, Finance, Business Administration, or related field.
- 2–5 years of relevant finance or accounting experience.
- Strong knowledge of accounting principles (IFRS/GAAP exposure is a plus).
- Advanced Excel skills; experience with ERP systems is an advantage.
- Analytical mindset with strong numerical and problem-solving skills.
- Excellent attention to detail and ability to work with deadlines.
- Strong communication skills; team player with a proactive attitude.

What We Offer:

- Opportunity to develop toward a Controller / Senior Controller role.
- A collaborative, ambitious, and growing finance environment.
- Professional development and training support.
- Competitive salary and benefits.

Contact Information:

Is this the job you are looking for?

Apply by sending your application and resume to Human Resource at hrm@jolleyholding.com with subject line “Assistant Financial Controller”.


For more information call (+297) 528-9550.

All information will be treated with the utmost confidentiality and discretion.

Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com



Parlamento di Corsou:

Cooperacion den Reino no mester mina autonomia

(Curacaochronicle) - E Parlamento di Curaçao a subraya cu cooperacion den Reino di Reino di Hulanda no mester ser haci na costo di autonomia di e isla. E posicion aki ta presenta den un decision adopta riba diabierna, despues di un opinion asesor di Raad van State tocante e futuro di e Statuto di Reino.

Segun Staten van Curaçao, cooperacion den Reino mester keda basa riba voluntaridad, igualdad y respet mutuo. Involucracion mas grandi di Reino of di Hulanda, segun Parlamento, no mester hiba na direccion, control of centralisacion di autoridad.



E decision ta sigui un informe asesor di Raad van State, emiti den contexto di 70 aña di Statuto di Reino. Aunke Parlamento di Curaçao ta reconoce e importancia di cooperacion entre e paisnan di Reino, e ta declara cu cooperacion por ta duradero solamente si autonomia ta respeta y no ta erosiona poco poco.

E Parlamento ta opondre explicitamente contra acuerdo of medida cu por resulta den un cambio di balansa di poder den Reino. Cooperacion, segun nan, mester tuma lugar principalmente door di arreglo mutuo entre paisnan, y no door di acto di consenso di Reino impone, a menos cu interesnan imperativo ta hustifica claramente tal medida.

Ademas, e Parlamento ta yama pa un balansa mas miho den toma di decision den Reino. E ta sugeri cu e rol di Minister Plenipotenciario por ser fortaleci pa mehora representacion di Curaçao, mientras cu e ta enfatisa cu esaki no mester resulta den ningun restriccion di autonomia di e isla.

E Parlamento tambe ta ripiti su yamado pa un mecanismo independiente pa resolve disputa den Reino.

Un sistema asina lo permiti cu conflicto entre paisnan por ser resolvi di manera cu tin peso legalmente, evitando situacionnan unda un parti finalmente ta dicidi riba disputa den cual e mes tin in-

teres directo.

Tambe e Parlamento di Curaçao ta declara cu igualdad den area manera derechonan humano, bon gobernacion y desaroyo economico mester ta visibel pa ciudadano nan den tur parti di Reino. Sosten pa Curaçao, segun Parlamento, mester ser basa riba solidaridad y responsabilidad comparti, y no riba condicionnan cu ta aumenta dependencia.

E decision a ser adopta durante un sesion publico di Parlamento riba diabierna, 13 di februari 2026, y ta constitui e reaccion oficial di Parlamento di Curaçao riba e opinion asesor tocante e futuro di cooperacion den Reino di Hulanda.

Homber condena na Hulanda despues cu mensahenan a revela contrabanda di cocaina for di Corsou

(Curacaochronicle) - Mensahenan di WhatsApp tocante un biahe for di Curaçao a causae condenacion di un homber na Hulanda pa su envolvimien to den contrabando di cocaina. E Gerechtshof Amsterdam a determina na apelacion cu e homber a cumpli un rol di coordinacion den importacion di casi un kilo di cocaina via Schiphol Airport.

E droga a ser descubri dia 15 di april 2024 den maleta di un co-acusado cu a yega for di Corsou. Oficialnan di aduana a haya dos yama sealbags den e ekipahe, conteniendo hunto 941,6 gram di cocaina.

Segun e corte, combersacionnan di WhatsApp cu a ser elimina a muestra cu e dos hombernan tabata den contacto intensivo prome cu e biahe.

E combersacionnan, cu tabata na lenguahe codifica, a ser interpreta como referi na e operacion di contrabando. Den un mensahe, e homber cu a ser condena a skirbi: "Pa kico bo ta completamente prepara pa mi sa." E co-acusado a contesta: "Mi ta gusta cu mi cosnan bay den maleta. Mi no ta traga."

E combersacionnan tambe a referi na "e kilo y mei" y na

placa. Ademas, e corte a determina cu e sospechoso a aregla hospedahe na Curaçao y a indica cu lo manda un persona pa enkontra e pakete na Hulanda despues di yegada.

E homber a declara cu e mensahenan tabata referi na un fiesta sexual, pero e corte no a considera e splicacion ey creible.

El a ser condena na seis luna

di prison, di cual tres luna suspendi, cu un periodo di libertad condicional di dos aña.

E caso ta subraya con comunicacion digital, incluyendo mensahenan intercambia via WhatsApp, ta sigui hunga un rol clave den descubri y procesa caso nan di trafico di droga conecta cu Corsou y Hulanda.

Parlamento ta rechasa propuesta pa amplia derecho di voto Hulandes pa residente di Caribe

(Curacaochronicle) - E Parlamento di Staten van Curaçao a rechasa e propuesta pa duna ciudadanano Hulandes cu ta biba den e paisnan Caribenan derechonan di voto pa e Tweede Kamer, argumentando cu esaki no ta trata e deficit democratico existente den Reino.

Segun Parlamento, amplia derechonan di voto lo crea confusion den electorado lo-

cal di Curaçao mientras cu e ta ofrece poco influencia real riba decision den Reino. Mas cu 95 porciento di asuntonan cu ta debati den Parlamento Hulandes ta trata tema domestico Hulandes, limitando e relevancia di tal representacion pa residente di Caribe.

E Parlamento ta subraya cu legitimidad democratico den Reino mester ser aborda door di balansa institucional, y no door di participacion sim-

bolico. Igualdad real, segun nan, ta rekeri un representacion mas fuerte di e paisnan Caribenan den e estructura di decision di Reino, y no incorporacion den Parlamento di otro pais.

Na lugar di esaki, Parlamento ta ripiti e importancia di fortalece e bos constitucional propio di Curaçao den Reino, incluyendo un rol mas sustantivo y cu autoridad pa e Minister Plenipotenciario.




Hende riba 55 aña ta esnan mas afecta pa recorte di presupuesto di gabinete nobo

(NLTimes) - E plannan den e acuerdo di coalicion D66, VVD, y CDA ta afecta desproporcionalmente hende riba edad di 55 aña, dos experto a bisa De Telegraaf. Trahadornan di edad avansa lo ser afecta mas fuerte pa recorte den beneficiacion di desempleo (WW) y discapacidad (WIA), mientras cu pensionadonan lo ser mas afecta pa recorte den cuido di salud. Un di tres experto a agrega cu e recorte di presupuesto tambe ta dal hobennan - tur hende ta ser afecta.

“Tin relativamente hopi hende grandi, y mas ta na caminda. Pues ta eynan e ganashinan mas grandi por ser haci for di recorte,” Paul de Beer, un profesor di relacionnan laboral na Universidad di Amsterdam, a bisa De Telegraaf. Esey ta refleha den e acuerdo di coalicion, el a bisa. “Hopi medida ta afecta hende grandi mas cu hende mas hoben. E acuerdo di coalicion no ta distribui uniformemente entre e generacionnan.”

Profesor Anet de Lange, un experto den empleabilidad sostenibel cu ta traha pa e firma di consulta Berenschot,



ta di acuerdo cu hopi medida den e acuerdo di coalicion lo ta perjudicial pa hende grandi. “E realidad ta cu e medidanan aki no necesariamente ta destina di e manera ey. Hopi plan den e acuerdo no ta destina pa stroba esnan riba 55 aña. Pero ta berdad cu e efectonan no ta neutral pa edad.”

Di acuerdo cu De Beer, e aumento den e edad di pensionen estatal lo no afecta trahadornan di edad mas avansa asina tanto. E efecto ey ta mas notabel pa hendenan mas hoben y hendenan den nan 40 aña. Pero recorte na e WW y

WIA lo afecta principalmente empleadonan riba 55 aña.

Gobierno nobo tin plania pa reduci e duracion di e beneficio di WW di dos pa un aña, por ehempel. “Si bo perde bo trabou como un trahador di edad avansa, bo tin mas chens di keda sin trabou pa mas cu un aña,” De Beer a bisa. “Den hopi caso, bo no ta bin na remarke pa asistencia social despues di ricibi beneficiacion di desempleo, pasobra si bo partner ta traha, bo no tin derecho riba nan.”

De Lange a bisa cu recorte na WW y WIA ta conta pa tur hende, pero Hulandesnan

di edad mas avansa lo sufri mas di e recortenan aki cu esnan mas hoben. A pesar di e mercado laboral estrecho, hendenan di edad avansa cu ta desemplea ta luchando pa haya trabou. “Investigacion ta muestra cu e imagen di trahadornan di edad avansa lamentablemente ainda ta negativo. Mi yamado ta pues pa realmente cuminsa traha riba sostene e grupo vulnerabel aki back den empleo.”

Ora ta trata di e recortenan di cuido di salud, De Beer a señala cu hendenan cu educacion mas abou of entradanan mas abou, promedio, tin mas chens di experiencia problemenan di salud. “E diferencianan den expectativa di bida saludabel ta significante. E recortenan den cuido di salud lo afecta principalmente e grandinan cu ya ta luchando.”

De Lange ta di acuerdo: “Hendenan vulnerabel di 55+ aña cu entradanan mas abou lo ta esnan cu lo sufri mas.”

E economista di Rabobank Leontine Treur, di otro banda, ta argumenta cu hobennan tambe lo ser afecta pa e politica nobo di gobierno. “Mi a lista e medidanan y a wak riba hoben y bieu, y

entradanan abou y halto. Mi conclusion ta cu tur hende lo ser afecta. Tabata di spera cu lo tin recorte basa riba e manifestonan di eleccion di D66, VVD, y CDA.”

Hobennan tambe lo ser afecta pa recorte den e WIA y WW—no solamente e duracion di e beneficio di desempleo ta ser corta, pero e suma maximo di e beneficio tambe lo ta mas abou. “Si bo tin 28 aña y ta trahando for di bo 16 aña, incluso un trabou part-time, bo tin derecho ainda riba un aña di beneficiacion di desempleo. Pues e recortenan aki lo afecta e hobennan aki tambe. Pero ta berdad cu hendenan di edad avansa, promedio, ta ricibi beneficiacion di desempleo mas largo. Den e sentido ey, nan lo ser afecta mas fuerte.”

E gabinete tambe ta reduci e suma maximo di e beneficiacion - e limite di entrada te na cual bo por reclama. Esaki lo afecta entradanan mas halto y mediano. “E ora ey e bahada di entrada pa motibo di desempleo y discapacidad por ta significante. Esaki ta conta tanto pa hende mas grandi como esnan mas hoben. Solamente cu e hobennan aki tin famia cu yiu y recientemente a cumpra un cas.”

A emiti mas permiso di construccion, pero construccion di vivienda ainda ta keda atras

(NLTimes) - Den e ultimo kwartaal di 2025, permisonan di construccion a ser emiti pa construccion di 24.200 cas, 1.500 mas cu den e di tres kwartaal, CBS Hulanda a informa ayera. Mas cas tambe ta ser construi, pero e cantidad ta keda atras di e permisonan otorga.

22.800 cas nobo a ser construi den e ultimo kwartaal, 3.600 mas cu den e mesun periodo na 2024 y 7.900 mas cu den e di tres kwartaal. Otro 4.700 cas a ser agrega na e cantidad di vivienda door di converti propiedadnan no-residencial of dividi casnan existente. 2.800 cas a ser basha abou, y 1.700 cas a ser converti den edificionan di otro uso. Den total, 23.100 cas mas a ser agrega na e cantidad di vivienda.

E cantidad di casnan nobo pa cual permisonan a ser emiti

pero cu no a ser construi ainda, a aumenta cu 1.000. Den e di tres kwartaal, el a aumenta cu 8.100 cas.

“Un atraso di permiso di construccion a acumula cu no por ser realisa,” Peter Boelhouwer, un profesor di e mercado di vivienda na Universidad di Tecnologia di Delft, a bisa NU.nl.

Un posibel motibo ta cu proyectonan ta luchando pa sigura financiamiento, loke ta resulta den plannan di construccion cu ta cay, Boelhouwer a bisa. Esaki ta particularmente un asunto cu proyectonan mas grandi manera edificionan di apartamento of terenonan residencial. Prome cu construccion por cuminsa, un cantidad minimo di cas mester ta bendi caba. Inversionistanan stranhero por ta menos ansioso pa cumpra propiedadnan di huur debi na regulacion di huur cu ta pone

presion riba ganashi den futuro, Boelhouwer a bisa.

El a agrega cu algun analista ta anticipa un alcance. Aña pasa, 69 mil cas nobo a ser

construi na Hulanda. E Instituto Economico pa Construccion (EIB) ta anticipa cu e cantidad ey lo aumenta te na 80 mil e aña aki y 84 mil otro aña. Mientras cu esey ta

un mehoracion, e ta hopi bou di e meta di gobierno Hulandes di construi 100 mil cas pa aña pa atende cu e scarsedad di vivienda.



Panama ta bolbe na mercado y ta reduci debe cu \$204 miyon

(Infobae) - E transaccion a inclui recompra di bono y emision nobo cu vencemento na 2034 y 2038, den un contexto di un saldo total cu ta pasa \$59 biyon.

Panama a bolbe na mercado internacional di debe, manera a ser anticipa door di Ministerio di Economia y Finanzas (MEF), door di un operacion integral di maneho di pasivo cu a laga reduci e saldo di debe publico cu \$204 miyon y genera spaa anual di interes di \$30 miyon.

E transaccion a registra un demanda di mas cu \$13 biyon, reflehando e apetit di inversionistanan internacional pa papel Panameño den medio di un escenario fiscal cu ainda ta desafiante. Segun e comunicado oficial, e operacion a inclui un oferta publico di recompra cu a ricibi proposicionnan pa \$8,9 biyon, mientras cu e emision nobo a alcanza un demanda cu a pasa \$13.000 miyon.

Panama a acepta mas o menos \$2,97 biyon den bono pendiente, priorisando un estructura cu ta optimisa e perfil di vencemento futuro y ta reduci presion di refinanciamiento a corto plaso. E ultimo biaha cu Panama a sali riba mercado internacional prome cu e operacion aki tabata den prome mita di 2024, ainda bao di administracion di Laurentino Cortizo.

Na e momento ey, y den un contexto di presion riba perfil di credito di e pais, e colocacion a ser haci cu tasa cerca di 8%, reflehando e costo mas halto di financiamiento cu e Republica tabata enfrentando den medio di incertidumbre fiscal y deterioro den percepcion di riesgo soberano. E emision nobo a ser structura cu vencementonan na 2034 y 2038, cu couponnan di 5,2%



y 5,6%, respectivamente. E MEF a destaca cu e operacion ta incorpora schema di amortisacion cu ta fortalece sostenibilidad fiscal na mediano y largo plaso, mientras cu ta mehora e perfil di credito di e pais despues di luna di presion riba finanzas publico.

E movimiento aki ta pasa den un contexto unda e debe publico acumula te cu 31 di december 2025 a alcanza \$59.349 miyon, mas cu dos biaha e saldo registra na december 2019, ora e debe total tabata \$31.018 miyon.

Den seis aña, e debe publico a crece cu mas o menos \$28.331 miyon, reflehando e impacto di pandemia, financiamiento di deficit fiscal y aumento sosteni di gasto publico. E componente mas grandi di e debe actual ta e debe externo, cu ta suma \$48.680 miyon, mientras cu e debe interno ta alcanza \$10.668 miyon.

E peso di debe externo ta representa mas cu 80% di e saldo total, cu ta confirma e exposi-

cion halto di e pais na mercado internacional y condicionnan financiero global. Den e debe externo, e segmento mas relevante ta sigui ta e di bono global, cu un saldo di \$32.281 miyon, un cifra cu practicamente ta duplica e \$17.541 miyon den bono cu tabata registra na 2019.

Esaki ta implica un aumento di casi \$14,74 biyon den emision internacional den seis aña, consolidando bono como e instrumento principal di financiamiento di Estado Panameño.

Den segmento multilateral, e debe cu organisacionnan manera BID, BIRF y CAF ta suma \$9.716 miyon, compara cu e \$6.041 miyon registra na 2019. E crecimiento den e componente aki ta refleha un uso mas grandi di financiamiento di organismo multilateral durante e añanan di crisis y ahuste fiscal.

Debe cu banconan directo tambe a muestra un salto significativo. Na 2019 e saldo tabata \$451 miyon, mientras cu na 2025 e alcanza \$6.058

miyon, evidenciando un diversificacion mas grandi di fuente di financiamiento den añanan reciente.

Na mercado domestico, e debe interno a subi di \$6.795 miyon na 2019 pa \$10.668 miyon na 2025, principalmente impulsa door di Nota di Tesorera, Cuenta di Tesorera y bono interno. E Nota di Tesorera actualmente ta suma \$3.886 miyon, mientras cu Bono di Tesoro ta alcanza \$2.414 miyon, reflehando un uso intensivo di instrumento di corto y mediano plaso.

E informe tambe ta revela movementonan relevante den relacion cu fondo di spaar di Panama, FAP. Na september 2025, nota pdi FAP pa \$1,39 biyon a ser cancela, incluyendo saldo y interes capitalisa, como parti di e strategia di reorganizacion di portafolio di debe.

Den termino di emisionnan activo, e portafolio actual ta inclui un gama amplio di Bono Global cu vencementonan cu ta extende te 2063, cu ta muestra un strategia di alarga plaso compara cu e perfil cu tabata existi na 2019.

Diversificacion di vencementonan ta busca reduci riesgo di concentracion den añanan specifico, aunke e volumen total ainda ta considerablemente mas halto cu seis aña atras. E MEF ta mantene cu e operacion reciente aki ta representa un paso concreto den e strategia di consolidacion fiscal, door di reduci e saldo total y baha e costo promedio. E demanda ricibi a ser presenta como un señal di confiansa den estabilidad macro-

economico y credibilidad di politica fiscal di e pais.

E Minister di Economia y Finanzas, Philip Chapman, a mantene cu e transaccion “ta representa un paso concreto den e strategia pa fortalece finanzas publico”.

El a sigura cu e operacion a laga reduci e saldo di debe, baha e costo di financiamiento y genera placa cu a spaar permanente pa e Estado, mientras cu a mehora e perfil di vencemento y a reduci riesgo di refinanciacion den añanan binidero.

Chapman a enfatisa cu e demanda fuerte di mas cu \$13 biyon ta refleha e confiansa di mercado internacional den estabilidad macroeconomico di Panama y den credibilidad di su politica fiscal.

Ademas, el a reitera cu e objetivo ta mantene un strategia di maneho di debe publico prudente y transparente, orienta riba preserva e perfil di credito soberano y fortalece sostenibilidad fiscal na mediano y largo plaso.

Sinembargo, e tamaño di e saldo total ta keda e punto principal di analisis. Cu \$59.349 miyon den debe acumula, Panama ta mantene un nivel historico halto, cu ta rekeri disciplina fiscal sosteni pa evita mas presion riba deficit y riba relacion debe/PIB.

E desafio awor no ta solamente refinancia cu condicionnan mas bunita, sino contene e crecimiento estructural di debe den añanan cu ta bini.

E retorno na mercado cu un demanda solido ta un señal positivo, pero e comportamiento futuro lo depende di crecimiento economico, ehecuion presupuestario y e capacidad di gobierno pa genera ingreso permanente.

E operacion di maneho di pasivo ta marca un punto relevante den strategia financiero di e pais. E ta reduci presion inmediato, ta mehora vencementonan y ta genera spaar anual, pero no ta cambia e hecho cu e saldo actual di debe ta casi dos biaha loke tabata existi na 2019.

E reto real lo ta estabilisa e curva aki y evita cu e siga crece na e ritmo observa durante e ultimo periodo di seis aña.



Ta ofrece recompensa di \$1 miyon pa lider di gang Haitiano acusa di secuestra ciudadano Mericano

(DiarioLibre) - Embahada di Merca na Haiti a anuncia ayera un recompensa di te cu un miyon dollar pa informacion cu ta conduci na e identificacion of localidad di Johnson André, alias "Izo," lider di e gang Haitiano Baz 5 Segond, pa e secuestro di un ciudadano Mericano.

Johnson André, conoci como "Izo Lucifer" of "Izo Vilaj de Dye", ta ser considera un di e lidernan di gang mas influyente di e pais y ta mantene control teritorial den Village de Dieu, un region considera strategico pa organisacionnan criminal den e capital Haitiano.

Di acuerdo cu e anuncio, e programa di Recompensa pa Husticia (RFJ) di e Departamento di Estado di Merca, administra pa e Servicio di Seguridad Diplomático, ta ofrece te cu un miyon dollar y e posibilidad di mudansa na



esnan cu ta duna informacion tocante André.

"André y su gang criminal ta existi rescate; famianan ta sufriendo. Ban stop e crimennan aki," ta un mensahe publica riba e cuenta di e programa

RFJ ta bisa.

E embahada a urgi cualkier hende cu tin informacion tocante André pa tuma contacto cu e programa "Recompensa pa Husticia" a traves di e plataformanan di Signal,

WhatsApp of Telegram. Di acuerdo cu e informacion publica, dia 18 di maart 2023, Izo y dos miembro di su gang criminal, Baz 5 Segond, a tuma un ciudadano Mericano como rehen na Port-au-Prince.

Izo despues a laga e victima bay despues di a ricibi un rescate.

E mision diplomatico a indica cu e informacion lo ser trata confidencialmente y por conduci na mudamento of na pago di e recompensa.

Na comienso di februari, un video a circula riba medianan social caminda ta mustra e lider di e gang di Baz 5 Segond ta participa y ta sponsor actividadnan aparentemente liga na e Carnaval di Haiti 2026 den e sector di Village de Dieu di Port-au-Prince.

Den e imagennan, publica dia 3 di februari riba su propio cuenta di TikTok, Izo ta ser mira ta canta riba un truck dilanti di decenas di hende durante un celebracion riba caya, aparentemente parti di un parada di carnaval den e area controla pa e grupo arma.

Jamaica: JTA ta adverti cu cambio na concesion di impuesto riba vehiculonan lo afecta maestronan

(JamaicaObserver) - Presidente di Asociacion di Maestronan di Jamaica (JTA), Mark Malabver, a bisa cu educadornan ta profundamente preocupa pa e cambionan proponi pa gobierno na e concesion di impuesto riba vehiculonan di motor pa trahadornan di sector publico, advertiendo cu e movimiento lo mina maestronan kende nan tareanan ta rekeri biahe, especialmente den comunidnan rural.



"E ta tumando efectivamente e pianan di conseheronan di guia, decanonan di disciplina, vice-rectornan, directornan, y hasta maestronan...for di nan pasobra e puestonan aki ta rekeri biahenan extenso," Malabver a argumenta.

El a señala cu actualmente, bou di e cuadro di concesion di 20% di impuesto, funcionarionan publico den puestonan eligibel ta haya un tratamiento di belasting preferencial riba importacion di vehiculonan di motor.

El a señala cu dentro di e cuadro aki, tanto e impuesto riba consumo special (SCT)

como e impuesto riba consumo general (GCT) ta ser dispensa completamente, y e impuesto di Douanne aplicabel ta 20% di e costo, seguro y balor di carga di e vehiculo.

"Consecuentemente, beneficiarionan di e aprobacion ta obliga di paga 20% di invoer-rechten sin responsabilidad pa SCT of GCT," Williams a bisa.

Minister di Finanzas a bisa cu e proposicion ta pa e aprobacion di 20% di impuesto riba vehiculonan di motor ser cambia y e 20% di invoer-rechten keda pagabel, e GCT ta bira pagabel, y e exoneracion

di SCT ta keda.

"E ganashi di entrada calcula asocia cu kitamento di e exoneracion di GCT ta aproximadamente \$1.3 biyon, y e lo ta na vigor 1 di mei 2026," e minister a agrega.

Pero dialuna, Malabver a bisa cu e proposicion "ta un asunto di preocupacion grave pa educadornan".

"Personanan cu ta awe asigna pa haya concesion di vehiculo ta manera directornan, vice-rectornan, decanonan di disciplina, y conseheronan di guia.

Esakinan ta e categorianan di educadornan cu ta haya concesion di vehiculo," Malabver a bisa.

"Pa motibo di impone un GCT di 15% riba concesionnan di vehiculo, esey invariablemente ta nifica cu ora bo haci e matematica, nos no sa si e GCT di 15% ta bay ser aplica despues cu e concesion di 20% di impuesto mes ta ser kita of prome.

No obstante, e ta bay resulta den un concesion di solamente 5% riba e calculacionnan," e presidente di JTA a argumenta.

El a keha cu e impuesto a ser proponi "sin ningun forma di consulta, of compromedimento tocante e funcionamiento interno di cualkier institucion", bisando cu e no por a compronde dicon, hasta despues di a reuni cu e Ministerio di Finanzas y Servicio Publico na hopi ocasion, no tabatin indicacion di e cambionan plania na e concesion.

"Nos tabata den negociacionnan activo riba of rond di 4 di februari, y na ningun momento Ministerio di Finanzas a indica na nos cu esa-

ki tabata e direccion den cual nan tabata bay. Nos tabata eynan na mesa di negociacion y nan no a busca pa involucra nos riba e asunto aki pa loke ta trata e GCT. Gobierno ta leu di e realidadnan riba tereno y kico nan ta haciendo ora nan ta haci esaki ta cu nan ta efectivamente reduci productividad den nos sistema di enseñansa," e presidente di JTA a bisa.

"Si gobierno no ta bay duna nos un concesion di 20%, y esey awor ta reduci na 5%, e ora ey tin sentido cu gobierno ta sigui un otro alternativa cu ta pa asigna un vehiculo di gobierno na cada oficial cu mester biaha. Esey ta e unico alternativa cu tin," el a argumenta.

"Si bo ta bay duna mi solamente un concesion di impuesto di 5% despues cu GCT ser aplica, esey ta nifica cu lo mi no por paga un vehiculo pa haci mi trabou.

Lo mi no por paga e vehiculo ey pa haci mi trabou, pues e alternativa ta pa gobierno provee cada oficial cu mester biaha dentro di e sistema di educacion cu un vehiculo," Malabver a agrega.

Actor Peter Greene a fayece despues di accidentalmente tira su mes

(TMZ) - Actor Peter Greene a accidentalmente los un tiro fatal contra su mes segun TMZ a haya sa.

Office of the Chief Medical Examiner na New York City a conta cu Peter su causa oficial di morto ta un herida cu arma di candela na su axila, heridando un ader principal y e manera di e morto a keda clasifica como un accidente.

Den otro palabranan, Peter a accidentalmente los tiro na su mes bao su brasa links y e bala a causa daño na e ader cu ta hiba sanger pa e brasa, el-leboog y man.

A haya Greene morto den su



apartamento na Manhattan den mita di december despues cu un bisinaa tende musica ta sali di su apartamento henter anochi y a yama polis ora cu nan a bati na porta,

y ningun hende a contesta. Polis a conduci un bishita pa wak su bienestar y a haya Greene morto.

Greene a haya fama pa su rol-



nan como villano den 1990, particularmente banda di Jim Carrey como Dorian Tyrell den e comedia "The Mask."

Tambe e tin rol den e genero


'pulp fiction' manera "The Usual Suspects," "Training Day," y "The Bounty Hunter."

Mia Goth preocupa pa Shia LaBeouf despues di detencion na Mardi Gras

(TMZ) - Mia Goth ta separa di su casa Shia LaBeouf pero te ainda e ta afecta pa su actonan reciente na New Orleans.

Fuentenan cu conocemento directo ta conta TMZ cu Mia ta "preocupa" tocante Shia. E strea di "Transformers" di 39 aña aparentemente tabata den un pelea despues di a dal un hende cu su cabes y dal hende mokete na un bar. Despues el a keda aresta y acusa cu 2 cargo di agresion.

Un fuente ta conta cu Mia su sentimentonan pa Shia a caba despues cu nan a separa alrededor di 1 aña atras, pero te ainda ta papia cune ora cu e kier conecta cu nan yiu muhe Isabel, ken a nace den 2022. Segun fuentenan, Shia ta sti-



ma su yiu muhe y tin un bon relacion cune.

Mientras cu Shia a muda y reloca pa New Orleans, actualmente Mia ta pasa su tempo cu Isabel na nan cas na Pasa-

dena.

Shia su drama mas recien ta e cadena mas recien di un cantidad di incidente preocupante pa e actor. El a drenta rehabilitacion bao orden di



corte den 2017 despues di un aresto na Savannah, Georgia, pa intoxicacion publico y conducta desordena. Den october di 2020, el a ser acusa cu un cargo di agresion y un cargo di robo na Los Angeles

pa supuestamente bay cu un homber su pechi.

Despues di su aresto mas recien, el a ser laga back den libertad na French Quarter ayera anochi.

Prins William ta enfatisa strategia pa salud mental



(AFP)—Prins di Gran Bretaña, William, a papia abiertamente diaranson tocante su strategia pa salud mental, unda e heredero di trono a revela cu e ta tumando "hopi tempo pa purba compronde mi emocionnan".

Participando den un discusion di panel riba Radio 1 di BBC, enfoca riba hobennan, William a haci yamado pa "mas mod-

elo masculino" yuda normalisa comersacionnan tocante salud mental, notando cu ta vital pa "ta bon cu bo mes".

Pa añas e prins di 43 aña y su esposa Catherine a haci apoyo pa salud mental un di nan causa principal, unda nan fundacion filantropico a lansa aña pasa un red nacional nobo pa prevencion di suicidio.

"Mi ta tuma hopi tempo pa purba compronde mi emocionnan y dicen mi ta sinti manera mi ta sinti, y mi ta kere cu esey ta un proceso hopi importante pa haci di vez en cuando," William a bisa.

"Nos mester mas modelo masculino pafor papia tocante esey y normalisa esey pa asina e bira algo natural pa nos tur," el a agrega durante e discusion. Otro participante a inclui e rapper Professor Green.

"Ta bon pa pidi apoyo, pidi un amigo, busca yuda," William a bisa.

Su comentarionan a bin mientras presidente di Royal College of Psychiatrists a urgi gobierno pa aborda un "pandemia silencioso di salud mental" cu

ta afectando hopi hende na Inglatera.

Prevencion di suicidio

E colegio a indica cu tabatin 4,1 miyon persona—incluyendo 1,2 miyon mucha y hoben—den contacto cu servicio di salud mental na Inglatera den 2024/25, un aumento di 56 por ciento den ocho aña.

Aña pasa, den un video publica pa marca Dia Mundial di Salud Mental, e prins casi a yora ora el a papia tocante con suicidio a impacta un muher di ken su esposo a kita su propio bida.

Den e discusion trasmiti diaranson, William—di ken su mama Prinses Diana a muri den un accidente di auto na

Paris na 1997 ora e tabatin 15 aña—a toca riba e importancia di prevencion di suicidio.

"Si nos papia mas tocante esey y educa mas hende, nos ta spera cu e idea di suicidio ta keda mas y mas leu, pasobra bo sa cu posiblemente mañan, bo lo lanta y bo lo sinti completamente diferente."

E tambe a nota cu "ningun persona na mundo tin tur e hermentnan pa cada eventualidad of estado mental.

"Mi ta gusta busca hermentnan nobo pa ora mi tin mester di nan, y si nos mira esey asina, e ta normalisa e idea cu e cerebro algun biaha simplemente mester un tiki ayudo," William a agrega.

Amsterdam Manor Beach Resort ta celebra Carnaval di Aruba cu bishitantenan dedica pa un segundo año



Pa un segundo año consecutivo, Amsterdam Manor Beach Resort cu orguyo a ofrece bishitantenan un manera exclusivo y inmersivo pa experiencia Aruba su celebracionnan briyante di Carnaval, reforsando e compromiso di e resort pa celebra e cultura y herencia rico di e isla.

Durante e celebracion e año aki, a invita bishitantenan pa disfruta di un espacio dedica pa mira parada, diseñá pa garantisa comodidad, conveniencia y un conexon autentico na e tradicion mas colorido di e isla.

E experiencia aki a inclui personal atento presente, bebida refrescante y snack sabroso, transportacion organisa pa bay y bin for di parada, y un T-shirt di Carnaval conmemorativo pa marca e ocasion.

Aruba su Carnaval ta un di e eventonan cultural mas stima riba e isla, presentando disfraznan briyante, musica bibo, presentacionnan di baile ener-

getico y tradicionnan cu ta refleha e spirito y diversidad di e comunidad Arubano.

Por medio di un experiencia di Carnaval programa, Amsterdam Manor tin e meta pa duna bishitantenan no solamente e miho asiento pa mira parada, sino tambe un encuentro cultural significativo.

“Nos meta ta pa bay mas leu cu ofrece acomodacion,” segun Jurgen van Schaijk, Managing Director di Amsterdam Manor Beach Resort. “Nos kier nos bishitantenan haya un experiencia unico di Aruba—su herencia, su hendenan y su tradicionnan. Carnaval ta un di e expresionnan mas poderoso di nos isla su identidad, y nos ta orguyoso di facilita e conexon pa un segundo año consecutivo.”

E iniciativa aki ta parti di e compromiso mas amplio di e resort na turismo responsable y apreciacion cultural, sigurando cu bishitantenan por disfruta di Aruba na un manera autentico y respetuoso.

Por medio di combina comodidad y inmersion cultural, Amsterdam Manor ta sigui fortalece su rol como un resort boutique cu ta celebra e alma y curason di Aruba.



Festival di cine na Berlin ta rechasa acusacion di censura riba Gaza

(AFP)—Director di Berlin Film Festival a rechasa diaranson e acusacion di mas cu 80 figura di industria di cine cu e festival a yuda censura artistanan cu ta opone accionnan di Israel na Gaza.

Den un carta habri publica diamars, actor ganador di Oscar Javier Bardem y Tilda Swinton tabata entre un dozijn cu a critica e “silencio” di Berlinale riba e asunto y a bisa cu nan tabata “decepciona” cu su “envolvimento den censura di artistanan cu ta opone e genocidio continuo di Israel contra Palestinonan na Gaza.”

Den un entrevista cu Screen Daily, director di Berlinale, Tricia Tuttle, a bisa cu e festival ta respalda “libertad di expresion dentro di limitenan di ley Aleman.”

El a bisa cu e ta reconoce cu e carta a bin “for di un rabia profundo y frustracion tocante e sufrimento di e pueblo na Gaza.”

Sinembargo, el a rechasa



acusacionnan di censura, bisando cu e carta tin “informacion incorrecto” y “afirmacionnan impreciso tocante Berlinale” cual a ser haci sin evidencia of anonimamente.

Controversia riba Gaza a sigui marca e edicion di e año aki di e festival desde presidente

di hurado Wim Wenders a contesta un pregunta tocante e conflicto bisando: “Nos no por drenta den tereno di politica.”

E comentario a provoca novelista ganador di premio Arundhati Roy, ken tabata programa pa presenta un ver-

sion restaura di un pelicula cu el a skirbi, pa retira su participacion for di e festival.

Tuttle a bisa cu e festival ta representa “hopi hende cu tin un punto di bista diferente, incluyendo hopi hende cu ta biba na Alemania cu kier un comprension mas compleho di e posicion di Israel cu posiblemente e resto di mundo tin awor.”

Politiconan Aleman en general a muestra apoyo pa Israel mientras Alemania ta busca pa expia pa su herencia di Holocaust.

Sinembargo, opinion publico na Alemania a bira mas critico di e accionnan Israeli na Gaza.

Comentando riba e controversia na canal Welt TV, minister di Cultura Aleman Wolfram Weimer a defende Wenders y Tuttle contra critica, bisando cu nan ta dirigi e festival “den un manera balansa y sensitivo.”

“No mester bisa artistanan kico pa haci ora ta trata di

politica. Berlinale no ta un NGO cu un camara y directornan,” Weimer a bisa.

Gaza tabata regularmente un tema controversial na Berlinale den e ultimo añanan.

Na 2024, e premio di documental di e festival a bay pa “No Other Land,” cual ta sigui e desplazamento di comunidnan Palestino den West Bank ocupa pa Israel.

Oficialnan di gobierno Aleman a critica comentarionan “unilateral” tocante Gaza haci pa directornan di e pelicula ey y otronan durante e ceremonia di premio e año ey.




Mavs ta confirma cu Irving lo perde resto di temporada di NBA

(AFP)—Dallas Mavericks a confirma cu strea Kyrie Irving lo perde e resto di temporada NBA mientras e ta sigui recupera for di un operacion di rudia na maart.

Irving, nueve biaha All-Star, ainda no a hunga e temporada aki mientras e ta recuperando for di un operacion pa repara un ligamento anterior crusa na su rudia robes.

“E decision aki no tabata facil, pero e ta esun corecto,” Irving a bisa den un declaracion. “Mi ta gradici e organisacion di Mavericks, mi compañeronan di team y nos fanaticonan pa nan apoyo continuo durante henter e proceso.

“Mi ta mirando cu anticipacion pa bolbe mas fuerte e proximo temporada. E creen-



cia y determinacion cu mi tin solamente keda crece.”

Mavericks a bisa cu Irving

ta haciendo “progreso constante den su rehabilitacion y lo keda activamente involvi cu e team durante e resto di

temporada.”

ESPN a reporta cu Mavericks ta spera cu Irving lo por bolbe

entrenamento prome cu temporada caba pa asina cuminsa construi kimica riba cancha cu rookie Cooper Flagg.

Mavs a cuminsa preparacion pa reconstrui rond di Flagg ora nan a transferi 10 biaha NBA All-Star Anthony Davis pa Washington Wizards den un acuerdo di varios wega na e deadline di transferencia e luna aki.

E acuerdo tambe a inclui varios escogencia di draft den futuro, incluyendo un escogencia di prome ronda for di Oklahoma City den e draft di e aña aki.

Actualmente Mavs ta para na di 12 posicion den Western Conference y, cu record di 19-35, ta siete wega for di e zona di play-in.

Oficialnan Ucrainiano lo boicotia Weganan Paralimpico pa decision tocante bandera Ruso



(AFP)—Oficialnan Ucrainiano lo boicotia e Weganan Paralimpico di Winter, Kyiv a bisa diaranson, despues cu Comitè Paralimpico Internacional (IPC) a permiti atleta Ruso competi bao di nan bandera nacional.

Ucrania tambe a urgi otro paisnan pa no asisti na e ceremonia di apertura na Verona dia 6 di maart, como parti di un tension creciente entre Kyiv y federacionnan deportivo internacional cuatro aña despues cu Rusia a invadi

Ucrania.

Seis Ruso y cuatro Belaruso lo por participa bao di nan propio bandera na Milan-Cortina Paralimpico en vez di como atleta neutral, e organismo rector di e Weganan a confirma na AFP diamars.

Rusia a ser mayormente prohibi for di deporte internacional desde cu Moscu a invadi Ucrania. E decision di IPC a provoca rabia na Ucrania.

Minister di deporte di Ucrania, Matviy Bidny, a yama e decision “indignante” y a

acusa Rusia y Belarus di converti “deporte den un instrumento di guerra, mentira y desprecio.”

“Oficialnan publico Ucrainiano no lo asisti na e Weganan Paralimpico. Nos no lo ta presente na e ceremonia di apertura,” el a bisa riba red social.

“Nos no lo participa den ningun otro evento oficial di Weganan Paralimpico,” el a agrega.

Minister di Asuntonan Exterior di Ucrania, Andriy Sybiga, a bisa cu el a instrui embaadornan di Kyiv pa urgi otro paisnan tambe pa no asisti na e ceremonia di apertura.

“Permitiendo bandera di estadonan agresor ser hisa na e Weganan Paralimpico mientras e guerra di Rusia contra Ucrania ta sigui ta malo—moral y politicamente,” Sybiga a bisa riba red social.

Comisario di deporte di Union Europeo, Glenn Mulcaire, a bisa cu e tambe no lo asisti na e ceremonia di apertura.

Minister di Asuntonan Exterior di Italia, Antonio Tajani—pais anfitrión di e Weganan—a uni den e critica y a pidi IPC pa reconsidera su decision.

Kyiv ta existi disculpa

E decision di IPC a bin memey di tension haltu entre Ucrania y e Comitè Olimpico Internacional (IOC), cual ta supervisando e Winter Olympics cu ta actualmente tumando luga.

IOC a prohibi skeleton racer Ucrainiano Vladyslav Heraskevych despues cu el a nega kita un helm cu ta musta victimanan di guerra cu Rusia.

Ucrania tambe a expresa frustracion cu e persona scogi pa carga e borchu cu number “Ukraine” y guia su delegacion durante ceremonia di apertura a resulta di ta Ruso.

Reportahenan di media a bisa cu e muher ta un Ruso anti-Kremlin cu ta biba na Milan pa hopi aña.

“Scoge un persona Ruso pa carga e borchu di number ta despreciable,” vocero di e ministerio di Asuntonan Exterior di Kyiv, Georgiy Tykhy, a bisa durante un reunion den reaccion na un pregunta di AFP.

El a yama esaki un “violacion serio di e Constitucion Olimpico” y a existi un disculpa.

Kyiv tambe a expresa iritacion mas prome den luna ora presidente di FIFA, Gianni Infantino, a bisa cu e ta kere

cu tempo a yega pa reintegra Rusia den futbol internacional.

‘Guerra, mentira y desprecio’

Presidente di e Paralimpico Comitè Ucrainiano, Valeriy Sushkevych, a bisa AFP diamars cu atleta Ucrainiano no lo boicotia e Paralimpico.

Ucrania tradicionalmente ta duna prestacion fuerte na Weganan Paralimpico di Winter, terminando di dos den e tabla di medayanan cuater aña pasa na Beijing.

“Si nos no bay, esey lo significa permiti Putin reclama un victoria riba atletanan Paralimpico Ucrainiano y riba Ucrania door di exclui nos for di e Weganan,” e homber di 71 aña a bisa den un entrevista.

Rusia a ricibi dos puesto den alpine skiing, dos den cross-country skiing y dos den snowboarding. E di cuatro puesto di Belarus tur ta den cross-country skiing.

IPC a bisa anteriormente cu e atletanan lo ser “trata manera (esnan di) cualkier otro pais.”

IPC inesperadamente a kita su suspension riba atletanan Ruso y Belaruso durante e asamblea general di e organizacion na september.

Buskeda desespera ta cuminsa cana pa 9 skier desapareci na California



(AFP) - Rescatistanan ta ehecutando un buskeda intenso pa 9 skier cu a desaparece durante un avalancha den montanja di California, unda un tormenta grandi a trece varios pia di sneeuw.

Oficialnan a bisa cu un grupo di 15 persona tabata pega den e avalancha na Castle Peak den e area di Tahoe diamars mainta. A rescata 6 skier cu “diferente heridanan” e anochi ey segun Nevada County Sheriffs Office, aunke e ekiponan di rescate luchando contra condicionnan precario te ainda ta purbando di haya e otro nan mientras sneeuw ta cay y luz di dia tabata kita.

2 skier rescata a ser hiba hospital pa tratamento.

“Pa motibo di tempo extremo, el a tuma varios ora pa personal di rescate yega e skienan di manera safe y transporta nan pa seguridad unda nan a ricibi un evaluacion medico di Truckee Fire,” e agentenan a declara. “E buskeda ta andando cu condicionnan di tempo pendiente.”

Gobernador di California, Gavin Newsom, a haya informacion tocante e oepacion. “E estado ta coordinando un buskeda y rescate cu partnernan local y desplegando recursonan pa sostene respuesta activo,” su oficina a publica riba X.

Blackbird Mountain Guides, e compania liderando e trip, a bisa cu 11 cliente y 4 guia tabata kedando na Frog Lake desde dia 15 di februari. “E grupo tabata den proceso di regresa na e ruta ora cu e incidente a sucede,” Blackbird a bisa den un declaracion, agregando cu e ta den “coordinacion completo” cu e agentenan policial tocante e operacionnan di buskeda.

Mas cu 40 empleado di emergencia tabata involucra den e buskeda, segun oficialnan, incluyendo “ekiponan di skier rescatista altamente habil” for di ambos Boreal Mountain Ski Resort y Tahoe Donner su Alder Creek Adventure Center, ken a keda desplega pa rescata e 6 sobreviviente conoci.

Un tormenta poderoso cu varios pia di sneeuw a sigui golpia e montaña Sierra Nevada durante dia, cu pronosticonan advertiendo cu lo tin condicionnan asina yama ‘white-out.’

Sugar Bowl Resort, den e area inmediatamente cercano, ta mirando te cu 5 pia di sneeuw den e ultimo siman, incluyendo 26 inch for di diamars pa diaranson mainta.

Expertonan a adverti tocante un riesgo di avalancha severo.

National Weather Service a bisa cu cierto parti riba di Sierra Nevadas por mira te has-

ta 8 pia di sneeuw durante e proximo 48 ora, cu biento di te hasta 90 kilometer pa ora. Capitan Russel Green a bisa stacion di noticia local KCRA cu oficialnan ta desencurasha hende di bay skii. “Hende ta bay y ta usa e area na tur momento,” Green a bisa. “Nos ta conseha contra esaki, obviamente, pero mi no lo bisa cu e no ta algo comun. Tampoco e tabata un decision sabio.”

Colorado Avalanche Information Center a conta 6 morto cu avalancha Mericano te cu awo e temporada aki, incluyendo un na Castle Peak den januari.

Un actualisacion despues a informa cu 8 di e 9 skier perdi a ser haya morto, cu 1 di nan te ainda desapareci den e condicionnan horroroso. “Te ainda nos ta buscando un di e miembronan,” Shannan Moon a bisa, expresando cautela cu e tormenta ta strobando cualkier movimiento. “Condicionnan di tempo extremo no lo ta suficiente pa describi e situacion: hopi sneeuw, bientonan fuerte, y tur esaki ta haci dificil pa por wak,” Moon a sigui conta.

Placer County Sheriff Wayne Woo a pidi publico pa keda leu di e area te ora cu tempo mehora. “Please evita Sierras durante e tormenta actual aki y den e dlanan binidero, evita biaha pa montañanan. E ta sumamente peligroso.”

Seattle Seahawks poni na benta despues di victoria na Super Bowl



(AFP) - Seattle Seahawks oficialmente ta poni na benta, e club a bisa diaranson, simannan despues cu e franquisia di NFL a gana Super Bowl di NFL.

Seahawks ta propiedad di e famia Allen desde 1997, ora cu difunto co-fundador di Microsoft Paul Allen a compra e club. Su ruman muhe Jody tin control di e ekipo desde Paul su fayecimento den 2018, y for di hopi tempo a bisa cu esaki eventualmente lo ser bendi bao su ruman homber su plan di duna mayoria di su rikesa na caridad.

“E Estado di Paul G. Allen awe a anuncia cu el a cuminsa un proceso di benta formal pa Seattle Seahawks, e franquisia di NFL, consistente cu Allen su orden pa eventualmente bende tur su

bienes den deporte y dirigi tur ganashi di e estado na filantropia,” un declaracion oficial a bisa.


Dialogo cu posible cumprador nan ta anticipa di sigui durante off-season di 2026. Propietarionan di NFL eora mester ratifica un acuerdo di compra final. Seahawks a derota New England Patriots 29-13 anteriormente e luna aki, y a haya nan di dos victoria den Super Bowl.

Poco prome cu e wegá di NFL cu lo dicidi e campeon, media Mericano a reporta cu e benta ta cerca y cu dialogo na nivel di “propietario den e liga” ya caba a cuminsa.

E rapportnan, citando fuentenan di NFL no-oficial, a bisa cu e franquisia tin un balor di entre 7 pa 8 biyon dollar.

E franquisia tin desde su fundacion den 1974 basa na Seattle. E tabata aparentemente den bispo di un mudansa controversial pa Los Angeles prome cu Allen a compra esaki den 1997.

Allen tambe acumpra Portland Trail Blazer su ekipo di basketball den NBA, cual actualmente tambe ta den benta.



Sushi ta bira ‘high-tech’: India ta apostarriba e-waste pa mineralnan critico

(AFP) - Centenares di bateria descarta ta haci zonido riba un faha di transportacion mientras nan ta drenta un ‘crusher’ den un planta remoto den nort di India, alimentando un industria di multi-biyon dollar cu ta reforsa e ambicionnan geopolitico di e pais.

India ta sacando provecho di e sector creciente di “e-waste” — sacando mineralnan critico manera lithium y cobalt, cu ta necesario pa produci tur cos, for di smartphone te avionnan di combate y auto electrico, for di electronica diario.

Preocupacion global tocante dominancia di China como productor di mineralnan critico a pone New Delhi na accion, aumentando extraccion di e materialnan cu ta esencial pa su empeño den bira un centro di inteligencia artificial.

Cu demanda cu ta spera di subi fuerte y mineria domestico cu dificilmente lo entrega produccion significativa pa por lo menos un decada, e pais ta pone enfoka riba un fuente di cual hopi no ta tuma nota — e seronan creciente di sushi electronico.

Baterianan morto ta produci lithium, cobalt y nickel; pantayanan LED ta contene germanium; placa di circuito ta tene platinum y paladium; ‘hard disks’ ta almacena terararo — e-waste a ser describi hopi biaha como un “mina di oro” pa mineralnan critico.

India a genera casi 1,5 miyon tonelada di e-waste aña pasa, segun datonan oficial — suficiente pa yena 200.000 truck di sushi — aunke expertonan ta kere cu e cifra real por ta casi dos biaha mas halto.

Na planta amplio di Exigo Recycling na estado di Haryana, un mashin ta machica e baterianan di e-scooter te cu



nan bira un puero preto intenso. E material ta ser extraí den un likido color cora, filtra, evapora y finalmente transforma den un puero blanco fini — lithium. “Oro blanco,” a bisa e científico principal di e facilidad, mientras e ta wak e producto final.

Workshop di patio

Calculacion di industria ta indica cu “minería urbano” — recuperacion di mineralnan for di e-waste — por tin balor te cu 6 biyon di dollar anual. Aunke no ta suficiente pa cubri e demanda proyecta di India, analistanan ta bisa cu e por yuda absorbe shock di importacion y fortalece cadena di suministro.

Sinembargo, mayor parti di e-waste ainda ta desmantela den workshop informal pafo den patio, cu ta extrae metalnan facil di bende manera koper y aluminium, lagando mineralnan critico sin uso. Capacidad di reciclahe formal di India ta keda limita compara cu China y Union Europeo, tur dos cu a inverti hopi den tecnologia avansa pa recuperacion y sistema di monitor paso.

India tin un “dependencia di importacion di 100 porciento” pa mineralnan critico clave, incluyendo lithium, cobalt y nickel, segun Insti-

tute for Energy Economics and Financial Analysis. Pa cera e brecha, gobierno di prome minister Narendra Modi a aproba un programa di 170 miyon di dollar aña pasa pa impulsa reciclahe formal di mineralnan critico.

E programa ta basa riba regla di Responsabilidad Extendí di Productor (EPR), cu ta obliga fabricante nan recohe y canalisa e-waste pa recicladornan registra cu gobierno. “EPR a actua como un catalizador principal pa pone escala den e industria di reciclahe,” a bisa Raman Singh, director gerente di Exigo Recycling, un di e poco facilidadnan na India cu por extrae lithium. Otro analistanan ta comparti e opinion, bisando cu e reglanan a redirigi mas sushi pa sector formal.

“Prome cu EPR tabata implementa completamente, 99 porciento di e-waste tabata ser recicla den sector informal,” a bisa Nitin Gupta di Attero Recycling, cu ta bisa cu nan por recupera por lo menos 22 mineralnan critico.

“Mas o menos 60 porciento awor a move pa formal.”

Datonan di gobierno ta sugeri un cambio incluso mas halto, aunke criticonan ta bisa cu e cifra nan ta infla door di mal seguimiento di produccion total di e-waste.

Mas cu 80 porciento di e-waste di India ainda ta ser procesa informalmente, segun un nota di Programa di Desaroyo di Nacionnan Uni di october.

Yen di peliger

E think-tank NITI Aayog, cu respaldo di gobierno Indio, a

adverti cu reciclahe organisa ta keda atras tanto riba obhetivo di politica como riba crecimiento rapido di volumen di sushi. Reciclahe informal ta yen di peliger — candela habri, baño di acido y desmantelacion sin proteccion ta expone trahadornan na vapor toxico y ta contamina tera y awa.

Un parti grandi di e-waste di India ainda ta pasa door di canalnan informal, causando “perdida di mineralnan critico,” segun Sandip Chatterjee, asesor di alto nivel na Sustainable Electronics Recycling International.

“Sector informal di India ainda ta e columna vertebral di recohemento y clasificacion di desecho,” el a bisa AFP.

Na Seelampuri, un barío pover na Delhi cu ta hogar di un di e centro mas grandi di e-waste informal di India, cayanan chikito ta yena cu kabel enreda y aparato dañá.

“E companianan nobo ta

keda cu basta pa certificacion, pero e resto ainda ta bini pa nos,” a bisa Shabbir Khan, un comerciante local. “Negoshi a aumenta... no a disminui.” Incluso e sushi cu finalmente ta yega recicladornan formal hopi biaha ta pasa prome door di mannan informal, a bisa Chatterjee.

“Integra actor informal den cadena di suministro cu por ser sigui por reduci considerablemente” e perdida di mineralnan critico valioso durante clasificacion y desmantelacion, el a agrega. Ecowork, unico recicla door di e-waste no lucrativo autorisa na India, ta trata di haci esaki door di entrenamiento y espacio di trabao sigur.


“Nos entrenamiento ta cubri desmantelacion y henter proceso pa trahadornan informal,” a bisa gerente di operacion Devesh Tiwari.

“Nos ta bisa nan di e peliger, di e mineralnan critico valioso, y con nan por haci esaki den manera corecto pa e balor di material no baha.”

Na su facilidad na parti pafó di Delhi, Rizwan Saifi a desmantela un ‘hard drive’ descarta, sacando un magnet permanente cu lo bay pa un reciclador avansa, unda lo ser destrui pa recupera disprosium — un metal di terararo esencial pa electronica moderno.

“Prome tur cu nos tabata interesa ta koper y aluminium, pasobra esaki tabata tin mas balor den mercado di scrap,” a bisa Saifi, 20 aña.

“Pero awor nos sa con valioso e magneet aki ta.”





FIND US ON

BONDIA
ARUBA

www.bondia.com

ALSO AVAILABLE ON

f i d x

Chauffeur a hala banda robes net ora un auto ta bay subi e crusada



Dialuna atardi a drenta informe di un accidente cu hende herida na Bubali, mesora a dirigi tanto polis como ambulance na e sitio.

Na yegada di e ambulance nan a atende e victima na e sitio mes. Na yegada di e pa-

truya a bin compronde cu e chauffeur di un Icar bayendo nort den Caya Musica lo a hala na banda robes di caminda net ora cu un Mitsubishi

Lancer tabata subiendo e caminda y nan a dal den otro. Debi na e impacto e chauffeur di e Mitsubishi a resulta

herida y na yegada di e ambulance nan a atende e victima na e sitio mes.

Chauffeur a perde control y bolter cu auto na Rooi Afo


Diamars madruga a drenta informe di un accidente cu hende herida na Rooi Afo, mesora a dirigi tanto polis como ambulance na e sitio.

Na yegada di e patruya a bin compronde cu aki ta traya di un accidente unda un chauffeur a perde control y bay bolter cu e auto. Den e impacto e chauffeur a resulta herida.

Na yegada di e ambulance nan a atende e victima y a transporte cu urgencia pa hospital.



Pelea di pareha a termina cu schouder di dama disloca y homber deteni



Dialuna atardi a drenta informe di un pelea di pareha cu un dama herida na Tanki Flip, mesora a

dirigi tanto polis como ambulance na e sitio. Na yegada di e patruya a

hay'e pareha ainda ta pleita net e dama ta hala atras y cay cu dolor na su schouder. Polis mesora a detene e homber cu

a dal e muher di tal forma cu a disloca su schouder. Na yegada di e ambulance

nan a atende e dama y mester a transporte pa hospital.

Homber a cay y kap banda di su wowo

Diamars mainta a drenta informe di cu un homber a cay na Sero Janchi y ta herida, mesora a dirigi un ambulance na e sitio.

Na yegada di e ambulance nan a atende e victima y a transporte pa hospital.



Migrantenan Africano expulsa for di Merca ta yega Cameroon

(AFP)—Ocho migrante for di Senegal, Sierra Leone y Etiopia a yega Cameroon dialuna despues di nan a ser expulsa for di Merca, segun fuentenan cu a papia cu AFP diaranson.

Cameroon ta esun mas reciente entre varios pais Africano cu a ricibi stranheronan expulsa bao di e represion di migracion di presidente Mericano Donald Trump, despues di Ghana, Eswatini, Rwanda, Guinea Ecuatorial y Sudan di Sur.



Cinco homber y tres muher a yega Cameroon y autoridadnan ta teniendo nan den e capital Yaounde, segun Alma David, un abogado di migracion na Merca, y Joseph Fru

Awah, un abogado Cameroones familiarisa cu e caso.

Un fuente di Nacionnan Uni na Cameroon, ken a pidi pa no ser identifica, a confirma e informacion aki na AFP.

Ningun acuerdo cu ta regula tal transferencia entre Cameroon y Merca no a ser publica pa ningun di e dos pais.

Un otro vuelo for di Louisiana, cu nueve Africano abordo expulsa for di Merca, a yega Yaounde dia 14 di januari, segun New York Times a

reporta.

Desde cu Trump a bolbe e Cas Blanco un aña pasa, su administracion a negocia varios acuerdo di expulsion cu a ser fuertemente critica pa gruponan di derecho humano.

E administracion a manda stranheronan pa Sudan di Sur, Eswatini y El Salvador, a pesar di un preocupacion tocante nan record di derecho humano y a pesar cu no tur esnan deporta tabata origina di e paisnan ey.

Prome enviado femenino pa Palestina ta fayece na Francia

(AFP)—Leila Shahid, e prome diplomaat femenino cu a representa Palestina den exterior, a muri na sur di Francia na edad di 76 aña, su famia a confirma diaranson.

“El a muri awe,” su ruman Zeina a bisa AFP, sin duna mas detaye.

Naci na Libanon na 1949, Shahid tabata e prome muher pa representa e Palestine Liberation Organization (PLO) den exterior, cuminsando su carera na Irlanda y despues bira representante na Hulanda.

El a sirbi como enviado na Francia y despues como representante den Union Europeo.

E tabata un di e prome Pal-



estinonan cu a establece contacto cu Israelinan cu tabata na fabor di esfuersonan di paz.

“Leila Shahid, e embahador iconico di Palestina, a laga nos. Esaki ta un perdida grandi pa Palestina y pa mundo

cu ta kere den husticia,” Hala Abou-Hassira, representante Palestino na Francia, a bisa riba X.

Curpa di Shahid a ser haya diaranson den e pueblo di La Leque na sur di Francia, unda e tabata biba, segun un fuente

cerca di e investigacion cu a papia cu AFP.

Segun hallazgonan inicial, e ex-diplomaat, cu segun reportahenan tabata malo pa varios aña, aparentemente a muri pa suicidio, e fuente a bisa.

Un investigacion pa determina causa di morto a ser lansa.

Karim Amellal, un autor y academico Franco-Arhelino, a bisa cu Shahid tabata “un voz fuerte y digno pa Palestina na Francia, un defensor incansable di paz.”

“El a permiti mi reuni cu Yasser Arafat y a habri portanan pa un epoca di speransa, e epoca di e Acuerdonan di Oslo,” el a bisa riba X, referiendo na e lider Palestino difunto. “Un tempo cu ta muestra asina leu awe. Un epoca, lastimamente, cu a pasa.”

Francia oficialmente a reconoce un estado Palestino na september aña pasa.

Gruponan ambiental ta demanda administracion di Trump pa elimina regla clave di clima

(AFP)—Un coalicion amplio di gruponan ambiental y di salud diaranson a presenta un demanda contra decision di e administracion di Trump pa elimina un hallazgo cientifico importante cu tabata sirbi como base pa regulacionnan federal riba clima.

Documento di corte presenta na un corte di apelacion na Washington ta argumenta cu e movida di presidente Republicano Donald Trump—cu a elimina standardnan di gas di efecto invernadero pa automobilnan y a pone varios otro regla den peligro—tabata ilegal.

E “endangerment finding” di 2009 a determina cu gasnan di efecto invernadero ta pone salud publico den peligro y tabata fundamental pa decadas di politica federal riba clima.

Su eliminacion a ser ampliamente condena pa gruponan ambiental y hopi Democrata, y accion legal tabata anticipa.

E caso a ser presenta pa un coalicion amplio incluyendo American Lung Association, Clean Air Council, Union of Concerned Scientists, Sierra Club y Center for Biological Diversity.

“Nos ta demanda pa stop Trump di cende candela na

e futuro di nos muchanan na fabor di un regalo gigante pa companianan petrolero,” abogado David Pettit di Center for Biological Diversity a bisa den un declaracion.

“Ningun hende cu excepcion di Big Oil ta beneficia ora Trump ta destrui ciencia di clima y permiti auto y truck usa mas combustible y contamina mas.

Consumidornan lo paga mas pa yena nan tanki, y nos cielo y oceano lo yena cu mas contaminacion. E eliminacionnan di EPA ta basa riba argumento politico sin base, no riba ciencia of ley, y corte mester mira esey asina.”

Trump, 79 aña, a descarta preocupacion cu e eliminacion por costa bida door di empeora cambio climatico, reiterando su creencia cu calentamento global causa pa hende ta un engaño.

E administracion a presenta e medida como un forma pa spaar placa, alegando cu e lo genera mas cu \$1 biyon den ahorro regulatorio y baha costo di auto nobo cu miles di dollar.

E “endangerment finding” di 2009 tabata un determinacion basa riba consenso cientifico abrumador cu seis gas di efecto invernadero ta menasa salud y bienestar publico door di alimenta cambio cli-

matico.

Esaki a resulta for di un batalla legal prolonga cu a termina den un decision di Corte Supremo na 2007, Massachusetts v. EPA, cual a dicta cu gasnan di efecto invernadero ta cualifica como contaminante bao di e Clean Air Act y a duna orden na EPA pa determina si nan ta representa un peligro pa salud y bienestar publico.

Aunke inicialmente e aplicacion tabata limita na emisionnan di vehiculo, el a bira despues un base legal pa un serie mas amplio di regulacionnan di clima, cual awor ta vulnerable.

Grecia lo reclama potretnan di atrocidad Nazi haya riba Ebay

(AFP)—Grecia lo reclama un coleccion di potretnan di Segunda Guera Mundial publica pa benta on-line, cual pa prome biaha ta mostra un di e atrocidadnan mas grave di Alemania Nazi den e pais, e ministerio di Cultura a bisa diaranson.

E ministerio a bisa cu e potretnan ta muestra aparentemente “e ultimo momentonan” di 200 Comunista Griego ehecuta pa e regimen Nazi dia 1 di mei 1944.

Minister di Cultura Lina Mendoni a bisa cu un “coleccion completo” di potretnan, aparentemente tuma pa un teniente di e exercito Aleman cu tabata sirbi den Grecia durante guerra, a ser declara un



monumento nacional “pa motibo di su balor historico particular.” “Nan ta permiti nos encuadra

e drama di Grecia ocupa tambe via perspectiva di e ocupante,” el a bisa den un declaracion.

“Cu e declaracion di awe cu e coleccion ta un monumento, ministerio di Cultura ta adkiri e base legal pa reclama esaki y adkiri esaki den nomber di estado Griego,” Mendoni a bisa.

El a agrega cu e ministerio kier examina e coleccion completo di potretnan tuma pa oficial di Wehrmacht Hermann Heuer, cual tambe a sirbi na Belgica y Francia.

E revelacion a causa emocion fuerte den Grecia, specialmente entre famianan di e victimanan.

Suplente di partido comunista Griego, Giorgos Lambroulis, a bisa diaranson cu e partido te awor a identifica cuater homber den e potretnan.

Diesdos di e potretnan originalmente a aparece riba e pagina di Crain’s Militaria riba Ebay diasabra prome cu nan a ser kita for di website di alguna.

E 200 comunista a ser ehecuta como represalia pa ases-

inato di un general Aleman y su personal pa guerrilleronan comunista algun dia prome. E ehecucion den campo di tiro di Kaisariani na Atenas tabata un evento decisivo durante e ocupacion Nazi di Grecia entre 1941 y 1944, cual a ser marca pa varios atrocidad, mayoria di nan contra habitantenan di pueblonan Griego.

Comunidad Hudiu di Grecia tambe a ser devasta durante e periodo ey.

Alcalde di Kaisariani, Ilias Stamelos, a yama e descubrimiento “asombroso” diaranson.

“Esakinan ta e prome documentonan cu a sali na cla (tocante e evento aki),” el a bisa television estatal ERT.

Mayoria di e hombernan a ser aresta un aña prome durante redadanan anti-comunista pa polis di e dictador Griego Ioannis Metaxas.

Te awor, e unico testimonio di e ultimo momentonan di e 200 victima tabata un nota skirbi cu nan a tira for di un truck cu tabata hibando nan pa nan ehecucion.

Un di e potretnan ta mostra un grupo di e hombernan marchando door di un terreno. Varios otro ta mostra nan para contra un muraya na e campo di tiro.

Un potret ta mostra e hombernan guia pa drenta e campo di tiro despues cu nan a kita nan jacket pafu.

Mendonon a bisa cu expertonan di ministerio lo bishita e coleccionista na Evergem, Belgica, diaranson pa examina e potretnan.

Resultado Sorteo
18 februari 2026

Cadena Alexander Lottery ta presenta resultado di weganan di suerte

DIARIO	KORSOU	SUPER4	FLAMINGO
4798	8938	5776	1512
2924	4881	SUPER5	0154
3610	8653	-	4091

MERDIA

CATACHI

Sorteo # 4894

6985

4931

6530

MULTI-X

X2

BIG 4

Sorteo # 4894

8423

MULTI-X

FP

1OFF

Sorteo # 2950

3534

ZODIAC

Sorteo # 4894

6244

Geminis

LUCKY 3

Sorteo # 1768

722

MULTI-X

FP

CATACHI

Sorteo # 8779

2203

3123

7145

MULTI-X

FP

BIG 4

Sorteo # 7823

0597

MULTI-X

X2

1OFF

Sorteo # 2528

4344

ZODIAC

Sorteo # 6582

9295

Piscis

LUCKY 3

Sorteo # 1512

855

MULTI-X

X2

LOTTO 5

Sorteo # 2672

0 x Jackpot

0 x Match 4+

7 x Match 4

180 x Afl. 12,00

09-10-15-25-28

Joker 34 Letter M

Proximo Jackpot

190.000,-

LOTTO DI DIA

Sorteo # 7100

0 x Jackpot

3 x Match 4

115 x Afl. 8,00

07-10-11-24-28

Proximo Jackpot

51.000,-

MEGA

Sorteo #

0 x Jackpot

0 x match 4

0 x Afl. 500,00

0 x Afl. 50,00

0 x Afl. 15,00

Mega Ball

Proximo Jackpot

250.000,-

MEGA PLUS

Afl. 350.000,-

KORSOU

Sorteo #

Sorteo #

Sorteo #

QR Code

SUDOKU

To play sudoku, use logic to fill the empty squares so that each row, each column and each 3x3 box contains the numbers 1-9 only once. Puzzle difficulty increases from Monday to Sunday.

King Classic Sudoku

		1	4		9		3	
	9		2	7			1	
		7			5		8	9
4						8		
		8						4
6	1	5		4	2			3
7	3		9					8
1	8	4		2	3		7	6
9	5		7			3		2

Answer to previous puzzle

8	1	2	4	9	7	6	3	5
3	9	5	6	8	1	4	7	2
4	6	7	2	5	3	1	8	9
9	7	3	5	1	8	2	6	4
5	2	6	7	3	4	9	1	8
1	4	8	9	2	6	3	5	7
2	5	1	3	7	9	8	4	6
7	8	4	1	6	2	5	9	3
6	3	9	8	4	5	7	2	1

Difficulty: ★★

1/6

**Cas Di Cultura**

Vondellaan 2 Aruba
297-582-1010

F A D A

Campanastraat 5 Aruba
297-583-2999
297-583-9610

F A V I

Primavera 233 Aruba
297-582-5051
297-582-5222

F E P O

Engelandstraat 15 Aruba
297-583-1016
297-583-6607

**Fundacion Contra
Violencia Relacional**
Tel: 583-5400

**Fundacion Autismo
Aruba**

Irenestraat 21 Aruba
297-588-1179

**Fundacion Pa Nos
Muchanan**

Cumana 2 Aruba
297-583-4247

**Fundacion Tel Pa
Hubentud**

Wilhelminastraat 19
Aruba
297-588-6138

**Koningin Wilhelmina
Fonds**

Spinozastraat 9 Aruba
297-582-0412

Mary Joan Foundation

Sabana Blanco 8 Aruba

297-588-9999

Rode Kruis Aruba

Pedro Gallegostraat 14
Tel. 297-582-2219

Fax 588-3376

Famia Planea (SBVO)

Avenida Milio J Croes 17
B Aruba
297-588-9591
www.famiaplanea.org
famiaplanea@hotmail.com

**Stichting Fundacion
Guia Mi**

George Madurostraat 34
297-582-0088

Y M C A

Calbasstraat 1 Aruba
297-582-3072

AL-ANON group

Sabana Liber #8, Noord
(close to the hotels)
Tel: 736-2952 or
593-7081

**Dokter na warda**

Oranjestad San Nicolas
Hospital Imsan
7:00 pm / 10:00 pm **24 ora**

Botica na warda

Oranjestad: **San Nicolas:**
del Pueblo : Seroe Preto:
Tel. 582 1253 Tel. 584 4833

EMERGENCIA 911

POLIS

Oranjestad 100
San Nicolas 104
Santa Cruz 105
Noord 107
Tip Line 11141
Brandweer 115
Ambulance 911
Hospital 527-4000
Imsan 524-8833
Warda Costa 913
Seguridad Nacional 11911
Cruz Cora 582-2219

BOTICA

Aloe 584-4606
4 Centro Medico 584-5794
Central 585-1965
Dakota 588-7364
Del Pueblo 582-1253
Eagle 587-9011
Kibrahacha 583-4908
Maria 585-8145
Di Servicio Noord 586-4606
Oduber 582-1780
Paradera 588-6638
San Lucas 584-5119
Santa Anna 586-8181
Santa Cruz 585-8028
Sero Preto 584-4833
Trupial 583-8560

UTILIDAD

Setar 117
Web 525-4600
Elmar 523-7147

FUNERARIA

Aurora 588-6699
Royal Funeral H. 586-4444
Ad Patres 584-2299
Olive Tree 584-8888

**Aruba Transfer Tour &
Taxi C.A.**
Tel: 582 2116 / 582 2010

Taxi Adres Services (24h)
Tel. 587 5900

A1 Taxi Services Aruba
Tel: 587-8850
Tel: 280-2828
Whatsapp: 592-7024

Pastor Danes ta compara imagenan di abuso sexual na “colecta stampia”



(AFP) - Un Pastor Danes cu a download 80.000 potret y 2.300 pelicula cu imagenan di abuso sexual di mucha, incluyendo riba su computer di trabao, a bisa corte dialuna cu el a haci esaki pa motibo cu e ta manera “colecta stampia” segun media a reporta.

Tom Thygesen Frederiksen, di 60 aña, a confesa cu e ta den posesion di e potretnan y videonan durante e huicio na corte di Naestved, agencia di noticia Danes Ritzau a reporta.

“Mi ta increíblemente sorry pa loke mi a haci,” el a bisa corte.

Alrededor di 700 di e imagenan tabata considera di ta di e tipo mas serio, ilustrando violencia of coercion.

Polis a haya e material ora cu nan a haci un entrada hudicial na su cas den mei di 2024 despues di un tip cu nan a ricibi for di un servicio di comparti documento, Thy-

gesen Frederiksen a testigua cu nunca el a paga pa e material y nunca a sinti atraccion sexual pa muchanan.

Sinembargo el a bisa cu el a desaroya un adiccion na pornografia despues di lick na un link cu “potretnan prohibi.” “Pa motibo cu e tabata prohibi, tabatin un balor di fascinacion,” el a bisa.

Ora cu a puntra dicon el a download asina hopi material, el a contesta cu e tabata manera “colecta stampia - pero den un manera completamente eroneo.”

Thygesen Frederiksen, ken anteriormente a lidera gruponan di cuido pa muchanan, a keda suspendi for di su trabao como un pastor y despues a renuncia.

Ministerio Publico (OM) tin intencion di pidi un sentencia di por lo menos 6 luna di prison, Ritzau a reporta.

E veredicto lo ser duna dia 25 di februari.

Pronostico di tempo

**Tempo:**

Awe tardi y awe nochi:
parcialmente nubla cu un awasero breve
Den marduga y mañan:
parcialmente nubla cu un awasero breve

Temperatura maximo 32
grado celsius
Temperatura minimo 25
grado celsius
Indice di calor (heat index)
den y rond di oranan di
merdia: 33 pa 37 grado
celsius
UV index: 10

Bahada di solo : 6:46 pm
Subida di solo : 7:01 am

Biento:

Moder for di direccionnan
entre oost-noordoost y
oost-zuidoost; forsa 3 te
4 (12 te 30 km/ora, 7 te 16
nudo).
Durante di dia basta fuerte
te posiblemente fuerte den
rafaga; forsa 5 te 6
(31 te 50 km/ora, 17 te 27
nudo)

Situacion general di tempo
pa proximo 24 ora:
Humedad den atmosfera
regional lo trece algun area
di nubia cu lo bay pasa riba
e isla. Esakinan por causa
principalmente den oranan
di marduga y mainta di
diamars un awasero breve.

**Condicionnan maritimo/
estado di lama:**

Na partinan protegi di costa:
keto cu olanan rond di 1 pia.
Na partinan zuid protegi:
trankil, 1 te 2 pia.
Na partinan zuid no protegi:
trankil te modera cu olanan
di 2 te 3 pia.
Na partinan oost te
noordwest di costa:
Generalmente modera cu
olanen alrededor di 4 pa 5.


Aviso/ alerta:

Operadornan di boto mester
bay cu cautela na partinan
oost te noordwest di costa.



FIND US ON
facebook
@bondianoticia

ALSO AVAILABLE ON



Aurora

Royal Pray

Funeral Home & Crematory

*Berdad, esta bon Señor ta!
Su amor ta dura pa semper
y su fieldad te den siglo di
siglonan.
Salmo 100:5*



Nos reina:
Myrna Marie Geerman – Tromp
cariñosamente yama pa su casa, yiunan, y nietonan:
“Queen di Gasparito”
Sunrise: 3 di november 1945
Sunset: 11 di februari 2026

Na number di su estimado esposo:
Jacobo (Coby) Geerman

Yiunan: Susanne y Gilbert Croes
Denise y Emilio Geerman

Nietonan: Gilmher Croes y Berna
Jayden Croes
Emilio (Gio) Geerman y Tanya
Emilane Geerman y Randon

Rumanan: †Ricardo Tromp y Dulce Tromp
†Donald Tromp
Hubert Tromp y †Imelda Tromp
Edwin Tromp y Lydia

Manera ruman: Marella Van Oostveen y famia

Sobrino y sobrinanan:
Sharon Croes, Ed y yiunan
Sharleen Rodrigues, Miguel y yiu
Shamila Tromp y yiunan
Ryan Tromp, Saharia y yiunan
Lisa Vis, Aldwin y yiunan

Su ihanan: Angella Farro y Edsel Croes

Swa y cuñanan:
Ana Geerman, Thomas y yiu
Julie de Cuba, Henry y yiunan
Roberto Geerman, Migdalia y yiunan
Rita Geerman y yiunan
Minerva Webb, Eric y yiunan
Tina Libier y yiunan

Su bon amiganan; Alina Lacle (Chichi), Stella
Alleyne y Henita De Mey.

Ayudante di cas: Fanny Miranda
Enfermeranan di cas: Parousia Nursing Care.
Enfermera Madeleine, Evelyn y Teresa.
Enfermeranan di HOH piso 4, Dr. Alex Ponson y
Geriatric Nurse Anouska Wever.

Demas famia: Tromp, Oduber, Geerman, Croes,
Vis, De Cuba, Farro, Libier, Peña, Frans, Jansen,
Bertrand, Maduro, Leonardo, Kuiperi, Corsen,
Kock, Krozendijk, Peterson, Fowler, Boye, Blom,
Van Oostveen, Cybulkiewicz

Demas famia y conocirnan.

Acto di entierro ta tuma luga diahuebs dia 19 di
februari 2026 di 9or di mainta pa 11or di mainta na
Aurora Funeral Home.

Por bin bisti na colornan alegre.

Cremacion lo tuma luga den ceno familiar.
Nos ta lamenta cu despues di entierro nos no por
ricibi bishita di condolencia na cas.

Nos disculpa si den nos tristesa nos por a lubida
cualquier famia of persona.

Aurora

Royal Pray

Funeral Home & Crematory

*“Señor ta mi wardador, mi’n tin falta di nada.
Den cunucu di yerba berde e ta ponemi sosega.
E ta hibami na awa trankil,
pa mi bolbe haña forsa”.
Salmo: 23*

Cu dolor na nos curason, nos ta participa
fayecimento inespera di nos ser stima:



Euricca Stacy Balan
“Stass”
***28-02-2005 - †26-01-2026**

Na number di su:
Mama: Sherlyne Ilan
Tata: Stanley Balan

Padraastro:
Emile Isenia
Jean Surat Supris

Welanan:
Rigueuse Etienne
Joseline Cantave

Rumanan:
Ryan Balan
Tanisha Balan

Sobrina: Suzanna Aleysha-Jane Alectus

Tantanen:
Bernice Etienne
Falone Prospère Kerby
Nicole Petit Frere
Cassandra Sanon
Naica Dalce
Phara Bedard
Jasmine Laguerre
Nerlande Laguerre
Samatha Bedard

Tionan:
Jean Yves Etienne
Caleb Balan
Pierre Balan
Primo: Irshan

Demas famia na Haïti, amigo y amiganan di
School EPB Hato, amigo nan di Misa Bethal,
conocirnan y bisiñanan.

Acto di entierro lo tuma lugar na Aurora
Funeral Home diasabra 21 di februari 2026 di
2or pa 4or di atardi. Despues ta sali pa Santana
Central Sabana Basora.

Ta invita pa acto di condolencia cual lo tuma
lugar na Aurora Funeral Home diabierna 20 di
februari 2026 di 7or pa 9or di anochi.

Preferibel no bin bisti na color preto.

Aurora

Royal Pray

Funeral Home & Crematory

*Lo E seka tur lágrima for di nan wowo, I
morto lo no eksisti mas: lo no tin nada di
rou, nada di yoramento, nada di dolo mas,
pasobra tur kos di antes a pasa bai.
Rev. 21:4*



Nos ta anuncia fayecimento di:

Carlos A. Cohen de Aguas
***11-03-1957 †14-02-2026**

Na number di su:
Esposa: Rixie Cohen

Yiunan: Carol, Johan, Geraldine, Karla

Nieto(a)nan: Caithyn, Anthony, Maia, Alaia, Jacob

Rumannan: Jannet, Maribel, Eduardo, Alfonso, Juancho

Sobrino(a)nan: Franklin, Joel, Raisa, Daniel, Jennifer,
Kathreen, Katherine, Tatiana, Nataly, Stanley, Abraham, Eduardo,
Patrick, Ruben, Alex

Swa y cuñnan: Greg, Ivonne, Jackeline, Orieta, †Jhon, Jerry

Primo(a)nan: Wilson, Zusanna
Yernonan: Carlos Montoya, Juan Carlo Montoya, Thomas
Tippl.
Conocirnan y bisiñanan.

Despensa nos si den nos tristeza nos por a lubida un of otro
persona

Ta invita pa e acto di despedida cual lo tuma lugar Diahuebs
19 di Februari 2026 di 7or di anochi pa 9or di anochi na Aurora
Funeral Home. Cremacion lo tuma lugar den seno familiar.



Cu profundo tristeza Directiva, Staf y
Personal di Lotto ta anuncia
fayecimento di

Reginaldo Antonio Allee

Na bida ruman di nos colega
Myrtha Petronia

Nos mas profundo palabranan di
condolencia ta bay na henter famia

OLIVE TREE

FUNERAL CARE & CREMATORY

*"Señor ta mi Wardador,
pues mi'n tin falta di
nada; Den cunuku di
yerba berde, E ta pone mi
sosega.
E ta hiba mi na awa
trankil, pa mi bolbe haña
forsa. E ta guiami den
caminda drechi fiel na su
number."* Salmo 23

A bai sosega den brasa di
senjor:



Simona "Mona" Boekhoudt
*28-Oct-1941 †13-Feb-2026

Su mayornan:

†Augustin Boekhoudt
†Josefa Boekhoudt-Thiel

Rumanan:

†Regina "Ina" Boekhoudt
†Leon "Buchi" Boekhoudt
†Bernadito "Dico" Boekhoudt & †Petra
Boekhoudt-Tromp
Hyacintha Yrausquin-Boekhoudt y Roque
Yrausquin-Boekhoudt
Reinira "Rita" Boekhoudt
Simon "Chommy" Boekhoudt y Glenda
Boekhoudt-Leest

Cuña: Florencia Croes-Ras

Subrino y Subrinanan:

Zulaika y Rene Dijkhoff-Boekhoudt
Jahaira y Avi Dulman-Boekhoudt
Jairo Boekhoudt y Elton Semeleer
Margareth Boekhoudt y Answard Werleman
Gabriel Boekhoudt
Mary-Jane Boekhoudt y Johnny Erasmus
Glendeline y Alexis Kelly-Boekhoudt
Sobre Subrino y Subrinanan:
Lionel Vrolijk
Abigael Vrolijk y Charles Wu
Christian Dijkhoff
Tanya Dijkhoff y Gio Geerman
Josephine Dijkhoff
Tyler Boekhoudt
Mariangely Kelly
Gwenyth Erasmus

Sobre sobre subrino: Kendrick Dijkhoff

Ayudente: Di "Love & Care", specialmente
Sandra pa su dedicacion.

**Prima- y primonan, bisinjanan y demas
famia:** Boekhoudt, Thiel, Leest, Tromp,
Yrausquin, Ras, Dijkhoff, Dulman, Erasmus,
Kelly, Becker, Geerman, Britten, Hernandez,
Maduro, Gomez, Schwengle.

Entiero lo tuma lugar diabierna 20 februari,
2026 di 9:00am-11:00am na Misa Sta. Filomena
na Paradera. Sigui pa santana RK Paradera.

Despues di entiero lamentablemente no por
ricibi condolencia na cas.

Aurora

Royal Pray
Funeral Home & Crematory

*"Señor ta mi wardador, pues mi'n tin falta di nada;
Den cunuku di yerba berde, e ta pone mi sosega.
E ta hiba mi na awa trankil, pa mi bolbe haya forza"*
Salmo 23:1,2,3.

Cu inmenso dolor na nos curason, pero conforme cu
DIOS su boluntad, nos ta anuncia fayecimento di nos
estimado yiu, tata, ruman, primo, swa y omo.



Remberto Hyacintho Arendsz
Mihor conoci como "Remy" of "Raime"
* 16 December 1965
† 14 Februari 2026

Casá : †Charissa L. Arendsz-Fijnje

Yiunan :

Devin y Sharon
Caithlyn

Mayornan :

Remberto H. (Rembert) & Casilda Arendsz - Croes

Suegro/a: †Ruben (Ru) & †Francis Fijnje-Scholten

Ruman y swanan:

Mayra & Patrick Ruiz-Arendsz
Zuleika & Radhames Dijkhoff-Arendsz

Sobrino/a -nan:

Mikayla, Kyara & Elias
Zu-Ann & Zu-Laine

Tanta y Omonan:

† Theresita & †Edwin de Cuba-Arendsz
† Adriaan (Adri) & †Maxima (Chima) Arendsz-Croes
† Milda & †John (Jenny) Wever-Arendsz
† Pedro (Max) & †Lilian Arendsz-Galmeyer
Enny Arendsz
Norman & †Maria (Mena) Arendsz-Croes
†Roland (Loloy) Arendsz
Clyde & Annie Arendsz-Tromp
†Robertina (Tintina) Lacle
† Maxima (Chima) & †Adriaan (Adri) Arendsz-Croes
† Bertha (Betty) & Carlos Croes-Croes
† Everaldo & †Sofia Croes-Rasmijn
Louisa & †Erwin Henriquez-Croes

Mama di su yuinan: Annabel E. Croes y famia

Cuñanan: Richella Fijnje y Mario Arendsz
Drucilla Fijnje

Primo/amigonan yega di cas:

Ralph Wever, Renald (Nady) Wever, Cristian Bellanca,
Dino Croes, Boy Boezem, Alex Kock, Jairo Contreras

Demas miembronan di famia: Arendsz, Fijnje, Croes,
Dubero, Dijkhoff, Ruiz, de Cuba, Wever, Galmeyer, Tromp,
Lacle, Rasmijn, Henriquez, Harms, Scholten.

Un Danki Special na: Stichting Thuiszorg Aruba,
Dialyse Center HOH, Lite-Life Medicab N.V., Dr. Melanie
Ho-Kan You y personal

Acto di entiero lo tuma lugar 19 Februari 2026
(diahuebs), di 9or pa 11or di mainta na Misa Inmaculada
Concepcion na Santa Cruz y despues lo sali pa Santana
Catolico na Santa Cruz "Pader de Vries"

Nos ta pidi disculpa si den nos tristesa nos por a lubida un
of otro miembro(nan) di famia.

Ta duel nos cu despues di entiero nos no por ricibi bishita
di condolencia na cas.

Wikipedia riba Aruba ta invita comunidad pa dos evento Ban Wiki! den februari



**Wikipedia riba Aruba ta invita publico gen-
eral, profesionalnan y representantenan di in-
stitucionnan cultural pa participa den un otro
edicion di Ban Wiki!, un espacio habri, amis-
toso y colaborativo cu meta pa contribui na
hasi conocemento di Aruba mas accesibel riba
plataformanan di Wikimedia.**

Pa luna di Februari, lo tin dos evento enfoca riba
fortalecimiento di contenido digital relaciona cu
Aruba y colaboracion cu sector cultural.

Ban Wiki! – Mehora Coleccion di Luchtfoto di
Aruba

E prome evento lo enfoca riba mehora e coleccion
di luchtfoto (potretnan for di laira) di Aad Stolk
riba Wikimedia Commons. Durante e encuentro,
participante nan lo traha hunto pa agrega captions
cla, estructura data y metadata detaya. E meta ta pa
haci e imagennan mas reconocibel, mas facil di haya
y mas accesibel pa mundo henter.

27 di Februari 2026

5:00 PM – 7:00 PM

Biblioteca Nacional Aruba, Oranjestad (Sala di
computer)

Ban Wiki! Online – GLAM & Wikimedia Com-
mons

E di dos seccion lo tuma lugar online y ta dirigi spe-
cialmente na personanan y ekiponan cu ta traha den
organizacionnan di GLAM (Galeria, Biblioteca, Ar-
chivo y Museo). Sin embargo, e evento ta habri pa
tur hende cu tin interes pa siña con pa contribui na
plataformanan di Wikimedia. Experiencia no ta nec-
esario, interes si!

30 di Januari 2026

10:00 AM – 11:30 AM (AST)

Plataforma: Google Meet

Registracion

Personanan interesa por registra nan participacion
via pagina principal di Wikipedia riba Aruba, unda
nan por selecta "Join" y yena e formulario di regis-
tracion:

www.wikipediaonaruba.org

Wikipedia riba Aruba ta enfatisa cu participacion di
comunidad ta esencial pa sigui fortalece y preserva
conocemento riba Aruba den un manera habri y
accesibel pa tur hende. Bo participacion ta haci un
diferencia. Nos ta spera di mira bo den e proximo
edicion di Ban Wiki!

Corte ta duna orden na Italia pa paga pa blokeo di rescate di migrantenan

(AFP)—Un corte na Sicilia a duna orden na Italia pa compensa un NGO despues cu su barco di rescate di migrantenan a ser blokia na puerto na 2019, e grupo a bisa diaranson, provocando indignacion di prome minister Giorgia Meloni.

E corte na Palermo a dicta cu caridad Aleman Sea-Watch mester ricibi 76.000 euro (\$90.000) como compensacion pa e “bloqueo inhuisto”, segun un declaracion di e NGO riba red social.

Sea-Watch 3 a drenta waf na e isla Italiano di Lampedusa na juni 2019 desafiando un pro-

hibicion di gobierno, despues cu e tabata blokia na lama pa dos siman cu decenas di migrante abordo.

E barco—cual a tumba un nave di polis for di caminda ora el a yega—despues a ser confisca pa cinco luna, den un incidente cu a hala atencion rond mundo. “Ley un biaha mas ta para na banda di desobediencia civil,” Sea-Watch a bisa.

Ministerionan di Interior, Transporte y Economia y autoridadnan na Sicilia a ser ordena pa paga e gasto y costo legal di NGO, e agencia di noticia ANSA a reporta. Capitan di e barco, Carola



Rackete, a ser aresta pero e caso contra dje a ser descarta pa un hues na 2021.

Den un mensahe di video di-

aranson, Meloni a bisa cu e decision di corte a lag’e “literalmente sin palabra”. E no tabata na cargo e tempo ey, pero su gobierno ultraderechista a

purba limita actividad di barconan di rescate di migrantenan den Lama Mediterraneo.

Meloni, lider di partido Brothers of Italy, regularmente ta critica huesnan cu ta cuestiona su intento pa reduci migracion ilegal.

“Nos lo haci tur loke ta necesario pa defende frontera y seguridad di ciudadanonan,” el a bisa.

Siman pasa, ministernan a logra un acuerdo riba un proyecto di ley nobo cu lo permiti imposicion di un “bloqueo naval” pa evita barconan di migrantenan drenta awa teritorial Italiano.

Cas Blanco ta bisa Iran pa haci acuerdo mientras Trump ta insinua atakenan di Merca

(AFP)—Cas Blanco diaranson a adverti cu Iran lo ta “sabi” si e haci un acuerdo cu Merca mientras presidente Donald Trump un biaha mas a insinua accion militar.

E dos banda recientemente a reanuda combersacionnan indirecto, media pa Oman, despues cu Trump a menasa repetidamente accion militar contra Iran pa motibo di represion mortal contra manifestantenan luna pasa.

Un intento anterior pa negocia a collapse ora Israel a lansa atakenan di sorpresa contra Iran na aña pasa, iniciando un guerra di 12 dia durante cual Washington brevemente a participa pa bombardia sitio nuclear Irani.

“Iran lo ta hopi sabi pa haci un acuerdo cu presidente Trump y cu su administra-

cion,” secretaria di prensa di Cas Blanco, Karoline Leavitt, a bisa reporteronan.

Diaranson, Trump un biaha mas a sugeri cu Merca por ataca Iran den un publicacion riba su plataforma Truth Social, mientras acumulacion militar di Merca ta den marcha den Medio Oriente.

El a adverti Gran Bretaña pa no renuncia su soberania riba islanan Chagos den Oceano Indico, bisando cu base aereo Diego Garcia por ta necesario si Iran no acepta un acuerdo, “pa elimina un posible atake for di un regimen altamente instabil y peligroso.”

Mas prome diaranson, diplomatico principal di Tehran, Abbas Araghchi, a bisa cu Iran ta “redactando” un marco pa futuro combersacionnan cu Merca.

Iran y Merca a tene un di dos ronda di negociacion media pa Oman diamars na Ginebra.

Araghchi a bisa cu Tehran a yega na un acuerdo cu Washington riba “principionan guia,” pero vice-presidente di Merca JD Vance a bisa cu Iran ainda no a reconoce tur linea cora di Washington.

‘Nos no kier guerra’

Papiando diaranson, presidente Irani Masoud Pezeshkian a insisti: “Nos no kier guerra,” pero a sugeri cu Tehran no por cede na demanda di Merca.

“Desde e dia cu mi a asumi cargo, mi a kere cu guerra mester ser poni na un banda. Pero si nan ta purba impone nan boluntad riba nos, humilia nos y demanda pa nos baha nos cabe na cualkier costo, nos mester acepta esey?”

Mas prome diaranson, Araghchi a tene un yamada telefonico cu Rafael Grossi, hefe di e agencia nuclear di UN, International Atomic Energy Agency (IAEA).

Den e yamada, minister di Asuntonan Exterior Irani “a enfatisa e enfoke di Republica Islamico di Iran riba redacta un marco inicial y coherente pa avansa futuro combersacionnan,” segun un declaracion di su ministerio.

Tehran a suspende algun cooperacion cu IAEA y a limita acceso di inspectornan na sitionan bombardia pa Israel y Merca, acusando e organismo di UN di parcialidad y di no a condena e atakenan.

Mientras tanto, secretario di Energia di Merca, Chris Wright, a adverti cu Washington lo impedi Tehran di adkiri arma nuclear di “un manera of otro.”

“Nan tabata hopi cla tocante loke nan lo haci cu arma nuclear. Esaki ta completamente inaceptable,” Wright a bisa reporteronan na Paris prome cu reunionnan di International Energy Agency.



Demostracion di poder militar

Combersacionnan media pa Oman tabata dirigi pa evita e posibilidad di accion militar di Merca, mientras Tehran ta exige relajacion di sancionnan di Merca cu ta paralisando su economia.

Iran a insisti cu discusionnan mester ta limita na e tema nuclear, aunke Washington anteriormente a presiona pa e programa di misil balistico di Tehran y su apoyo pa gruponan arma den e region tambe ser inclui.

Mientras combersacionnan a reanuda, Merca tambe ta aumenta su presencia militar cerca di Iran.

Washington a ordena un segundo porta-avion pa e re-

gion, mientras e prome, USS Abraham Lincoln cu casi 80 avion, tabata posiciona aproximadamente 700 kilometer for di e costa Irani te diadomingo, segun imagennan di satelite.

Iran tambe a purba mostra su propio poder militar, unda e Islamic Revolutionary Guard Corps a cuminsa una serie di ehercicio di guerra dialuna den e Estrecho di Hormuz.

Politiconan Irani a menasa repetidamente pa cera e estrecho, cual ta un ruta global importante pa transporte di petroleo y gas.

Diamars television estatal a reporta cu Tehran lo cera partinan di e via acuatico pa motibo di seguridad durante e ehercicionan.



Gary Kasparov: Solamente un derota militar di Putin na Ucrania lo restaura speransa na Rusia y Europa

(Infobae) - E opositor reconoci a sostene cu e invasion na gran escala bao orden di Putin na februari 2022 tin como meta modifica estructura global, y cu e falta di un reaccion fuerte for di Occidente a faborece e aspiracionnan di e gobierno Ruso actual.

Pa Gary Kasparov, politico Ruso reconoci y gran maestro di schaken, solamente un derota militar di Vladimir Putin na Ucrania lo por bolbe duna speransa na su pais y na e continente Europeo. Casi cuater aña despues di inicio di e invasion na gran escala di Ucrania, Kasparov ta considera cu e guerra libra door di e Kremlin ta manifestacion di un mentalidad imperial profundamente aregla den sociedad Ruso, sosteni door decadas di propaganda y door di estructura di Estado.

Den un entrevista cu medio Ethic, e ex-campeon mundial di schaken, conoci pa anticipa movimiento tanto den e wega como den politica, a bisa cu Putin no ta un dictador tradicional, sino un lider cu a sali for di KGB, cu a logra manipula simbolonan y percepcionnan pa consolida su control. Kasparov tambe a adverti riba persistencia di e mentalidad imperial Ruso y a bisa cu guerra di Vladimir Putin ta bay mas leu di Ucrania; su obhetivo ta transforma e orden internacional y desafía Occidente.

Kasparov ta enfatisa cu convence e Rusonan cu e imperio a caba ta e unico caminda pa evita repeticion ciclico di autocracia y agresion na Rusia. “Dictadornan no ta hunga schaken, pasobra e ta un wega unda nos tin 100 % di informacion disponible,” Kasparov a splica, haciendo referencia na preferencia di Putin pa tactica tipo poker, unda engaño y incertidumbre ta instrumento clave.

Den su rol como estrategista, e ex-campeon mundial ta mantene cu e presidente Ruso a aposta pa mas cu dos decada riba e falta di reaccion internacional, haciendo cu e menasa di guerra hibrido y desinformacion ta reemplasa confrontacion militar directo.

E simbolo di cambio y e mecanica di dictadura

E victoria di Kasparov riba Anatoli Karpov na 1985, den



medio di Union Sovietico, a representa no solamente un triunfo personal sino tambe un simbolo di transformacion pa hopi hende. Mientras Karpov a simbolisa e regimen, Kasparov a personifica renobacion den un momento cu Mikhail Gorbachev a genera speransa di apertura.

E ex-campeon a recorda den su combersacion cu Ethic cu el a enfrente obstaculonan institucional, pasobra e sistema a purba proteha e representante di e status quo. Pa Kasparov, e lucha ey a tin un “efecto psicologico hopi importante, pasobra lucha contra dictadornan, lucha pa libertad, mester simbolonan.” El a enfatisa cu dictadornan ta prefera hunga poker y no

schaken pasobra nan por tapa nan carta y gaña; en cambio, schaken ta exige transparencia total, unda tur dos adversario ta conoce e recurso di otro.

Putin, segun Kasparov, tin “binti aña” usando e strategia di “linterna,” probechando e incertidumbre di su rivalnan mas cu e forsa real di su posicion.

Putin, memoria imperial y guerra sin regla

Kasparov a ser un di e bosnan cu a adverti, incluso antes di guerra na Ucrania, riba e deriva autoritario di Vladimir Putin. Manera el a splica na Ethic, no tabata ‘clairvoyance’, sino conoce con pa scucha Putin, cu —manera otro dictadornan— semper a expresa abi-

ertamente su metanan. Diferente momento ta sobresali: restauracion di e himno sovietico, declaracion di Putin na 2005 describiendo caida di URSS como “e pio catastrofe geopolitico di siglo 20”, y e ultimatum lansa na Munich na 2007 pa OTAN pa regresa na frontera di 1997.

Pa e gran maestro, e plan di Putin pa “restaura influencia Ruso” a keda cla desde hopi tempo antes di 2022. E ofensiva na gran escala contra Ucrania tabata culminacion di un proceso cu a inclui e invasion di Georgia na 2008 y e tolerancia internacional ripiti na e Kremlin. Kasparov ta adverti: “Putin no ta buscando solamente Ucrania, sino un cambio den e orden liberal

mundial.”

Un guerra hibrido cu a disemina na Occidente

E conflicto na Ucrania, segun Kasparov, ya no ta limita na teritorio Ucrainiano: “Esaki ta un guerra contra Union Europeo, contra OTAN, contra Merca.” El ta sostene cu Europa ta biba den calma relativo solamente pasobra e Ucrainianonan ta enfrente e atake Ruso. Aunke e continente tin recurso, ta falta decision o boluntad pa confronta e Kremlin abiertamente.

E ta duna como ehempel e reaccion occidental na invasion Ruso di Georgia, ora Union Europeo a busca minimisa responsabilidad di Moscu. Kasparov ta bisa cu Putin a identifica e oportunidad pa actua cu impunidad y a probecha, actuando manera un dictador cu mentalidad KGB y no solamente militar. E ta resalta existencia di lobby y grupo politico den diferente pais Europeo financia directamente door di Rusia.

For di su punto di bista, e gran eror di Putin tabata subestima deseo di libertad di sociedad Ucrainiano, pero el tabata corecto den anticipa e reaccion occidental limita: “E unico cos cu nan a ofrece tabata yuda pa Zelensky scapa. Putin no lo sali mientras cu e tin recurso.”

Merca, Trump y riesgo democratico

Den su analisis di politica Mericano, Kasparov ta destaca diferencia entre tradicion democratico di Merca y historia di Rusia. Sinembargo, e ta observa paralelonan en cuanto a strategia di erosion interno. E ta acusa Donald Trump di purba “desmantela e balans clave” den democracia Mericano, cu segun e su fortaleza a preveni un colapso manera esun di Rusia. Ainda asina, e ta yama sociedad Mericano pa keda alerta: “Ta necesario pa e Mericanonan lanta. Y ta parce cu e pais ta lanta.”

Riba relacion di Trump cu Putin y Ucrania, e ta mantene cu e ex-presidente a actua principalmente for di interes personal y cu su falta inicial di apoyo pa Kiev tabata pasobra el a pensa cu Ucrania a keda perdi: “Pero na fin di zomer Trump a mira mapa y ta mira cu Putin no ta gana.”